

淵

穎

集

二





133519



集 穎 淵

(二)



撰 萊 吳

淵穎集卷二

夜聽楊元度說宣和內宴雜事

〔蔡京太清樓侍宴記〕政和二年三月八日。皇帝開後苑。宴太清樓。召臣京及執中等於崇政殿賜坐。命宮臣擊鞠。乃自景福殿西序入苑門。詔臣京曰。此趾步至宣和廊。言者

所謂金柱玉戶者也。厚誣宮禁。其令子攸夜入觀焉。東入小華徑。南度碧蘆聚。又東入便門至宣和殿。日午。謁者引執中已下入。女童樂四百靴袍玉帶列排場下。宮人籠珠翠金玉束帶。秉扇拂與巾劍鉞。執香毬擁御床。以次立。酒三行。上顧謂羣臣曰。承平無事。君臣同樂。宜略去苛禮。飲食起居當自便。無間已而羣臣盡醉。

北風吹庭柯。秋士慘不悅。

〔淮南子〕春女思秋士悲。

頗懷炎德衰。

〔謝朓郊廟歌赤帝云〕惟此夏德德台恢。兩龍在御炎精來。

一旦幅員裂。

〔詩〕幅員既長。

當思

付畀重。但孕驕淫蟹。

蟹音業。〔說文〕衣服歌謠草木之怪謂之諛。禽獸蟲蝗之怪謂之蟹。

中宮日沈灑。

〔書〕沈灑于酒。

內伎增舞列。聖人自鳴箏。丞相

齊按節。奇花入網蓮。

〔宋史〕徽宗垂意花石。以朱勳領蘇杭應奉局。取浙中珍異以進。舳舻相銜於淮汴。號花石綱。

法酒從流獸。

〔前漢叔孫通傳〕置法酒。諸侍坐殿上。皆伏抑首以尊卑起次。上壽觴九行。謁者

言罷酒。御史執法。舉不如儀者輒引去。竟朝置酒。無敢謹譁失禮者。〔注〕法酒猶言禮酌。謂不飲之至醉。

畫圖恍有見。帷薄知甚褻。

〔前漢敘傳〕富平定陵侯張放。淳于長等愛幸。帝出爲微行。則同輿執轡。入侍禁中。設宴飲

具訓于
蒙士

讀漢武內傳寄戴仲游

我問學仙子，神仙何所求。翩然王母使，

〔集仙錄〕西王母者，九靈太妙龜山金母也。一號太虛九光龜臺九母元君，乃西華之至妙洞陰之極尊位配西方，母養羣品，天上天下三界十方女子之登仙得道。

者，咸所隸焉。〔內傳〕帝問居承華殿，忽見美女曰：我傭宮王女，王子登也，向為王母所使，從崑崙山來。語帝以七月七日王母將降。〔又〕王母有一青鳥，常從西方飛集帝庭。

特降五城樓。五城樓，解見早秋作。

白雲起復滅，丹

掖戒涼秋，黃麟雜赤虎，旌幟鬱蚺。

〔內傳〕七月七日，帝修除宮掖，盛服立於塔下，以候雲駕。二更後，忽見西南如白雲起，鬱然直來，逕趨宮庭，須臾轉起，聞雲中簫鼓之聲，人馬之響，半食頃，王母至也。或駕龍虎，

或乘白麟，或乘白鶴，或乘軒車，或乘天馬，羣仙數千，光耀庭宇，既至，從官不復知所在。

上元三角髻，聞命亦來游。

〔又〕王母欲去，帝下席叩頭請留，王母乃遣侍女郭密香，邀上元夫人同宴於漢宮，帝見侍女下殿，俄失所在，須臾，上元夫人遣一侍女問答云：阿環再拜，聞命之際，即當命駕，先被太君勅詣玄洲，還便束帶，願暫少留，俄而夫人至，服青箱之袍，頭作三髻，餘髮散垂至腰，戴九雲夜光之冠，曳六出火王之佩，垂鳳文林華之綬，腰流黃輝精之劍，上殿向王母拜，王母呼同坐，謂帝曰：此真

元之母，尊貴之神，帝拜之。

玉女列左右，容眸盼如流。

〔又〕西王母乘紫雲之駕，九色斑龍，別有五十天仙，側近鸞輿，皆長丈餘，同執綵旄之節，佩金剛靈璽，戴天真之冠，咸住殿下，王母惟扶二侍女上殿。

神光乃

上爚，衆樂發空謳。

〔又〕王母升帝殿，於坐上流觴數遍，王母乃命諸侍女，王子登、彈八琅之璫、董雙成吹雲和之笙、石公子擊昆庭之金、許飛瓊鼓震靈之簧、婉麗華拊五靈之石、范成君擊湘陰之磬，段安香作九天之鈞，於是衆聲徹朗，靈音

駭空。又命法嬰歌支靈之曲。

益易尚可化。

〔又〕王母曰。夫欲修身。當營其氣。太僊真經所謂行益易之道。益者益精易者易形。能益能易。名上僊籍。不益不易。不離死厄。

奢淫直難抽。

〔又〕上元夫人謂帝曰。汝好道。亦為勤。

矣。動而不獲。實有由也。汝胎性暴。胎性淫。胎性奢。胎性酷。胎性賊。五者恆舍於榮衛之中。五藏之內。雖獲良鍼。固難愈也。此五事者。皆是截身之刀。鋸。剗。命之斧斤矣。若從今捨爾五性。反諸柔善。當有異耳。

從知扶廣受。或用柏梁收。

五嶽形已祕。靈飛籙仍幽。

〔又〕王母巾笈中。有一卷書。盛以紫錦之囊。出以付帝曰。此五嶽真形圖也。上元夫人語帝曰。呵母。今以瓊笈妙韞。發紫臺之文。賜汝八會之書。五嶽真形。至珍且貴矣。乃命侍女紀離容。到扶廣山。勅青。

眞小童。出六甲。左右靈飛。致神之方十三事。以授帝。王母曰。此三天太上之所撰。藏於紫陵之臺。隱以靈壇之房。封以華琳之函。韜以蘭蘭之帛。約以紫羅之素。印以大帝之璽。子其寶祕焉。帝奉以黃金之箱。封以白玉之函。以珊瑚為軸。紫錦為囊。安著柏梁臺上。

毋將

剗爾命。但欲返諸柔。一洗狐鳥狙。長辭螻蛄丘。

狐鳥螻蛄。見射的山。解。

向時恍有見。方士殊悠悠。

〔按〕漢紀元光元年。遣方士李少君入海求蓬萊。

安期生之屬。元狩四年。拜方士齊少翁為文成將軍。又以方士欒大為五利將軍。尙公主。後俱以誣罔伏誅。帝對羣臣嘆曰。天下豈有神仙。盡妖罔耳。罷方士候神人者。

平準暴海內。

〔史記〕元封元年。桑弘羊為治粟都尉。領大農。筦天下鹽鐵。弘羊。

請置大農部。丞數十人。分部主郡國。令遠方各以其物貴時。商賈所轉販者為賦。而相灌輸。置平準於京師。都受天下委輸。召工官治車。諸器皆仰給大農。大農諸官。盡籠天下之貨物。貴即賣之。賤則買之。如此富商大賈。無所牟大利。而萬物不得騰踊。名曰平準。

發兵

困遐陬。

〔按〕漢書元光五年。通南夷。置犍為郡。通西夷。置一都尉。元朔二年。匈奴入寇。遣衛青等將兵擊走之。遂取河南海地。立朔方郡。元狩元年。以霍去病為驃騎將軍。擊匈奴。敗之。過焉支。至祁連山而還。元鼎五年。遣將軍路博德將兵擊南越。置南海。蒼梧。

鬱林。合浦。交趾。九真。日南。珠厓。儋耳。為九郡。又平西南夷。置牂柯。越嶲。沈黎。文山。五都。為五郡。元封二年。遣將軍楊僕伐朝鮮。置樂浪。臨屯。玄菟。真番。太初元年。築受降城。又遣將軍李廣利伐宛。

琪花栖倒景。

琪花。解見早秋偶然作。倒景。解見星君像圖。

瑤草隔玄洲。〔十洲記〕玄洲在北海之中。上有太玄都。仙伯真公所治。饒金芝玉草。終成泄道要。寢使增愆尤。鄙夫忽自笑。頽俗奚其媮。機關出鬼

蜮。〔詩〕爲鬼爲蜮。利欲生螟螽。〔又〕去其螟。臟及其蝨賊。崑崙一萬里。得去那能留。〔水經〕崑崙山在西北。去嵩高五萬里。地之中也。高萬一千里。河水出其東北。屈從其東南。流入渤海。

爲爾遣此什。塵簪早須投。〔史記〕投簪請老。〔南史〕陶弘景與從兄書曰。昔仕宦期四十左右。作尙書郎。投簪高邊。今三十六方奉朝請。頭顱可知。遂掛冠神武門。上表辭歸。

讀書

我病久不出。滿牀攤我書。困仍枕書臥。醒卽味道腴。〔荀子〕味道之腴。上下千百載。纍然猶貫珠。禮樂纍如貫珠。夏商既相

因。秦漢漸不如。辭華日已勝。理義幾精麤。但要務真實。何心成蠹魚。古人有精力。常欲開廣塗。聖文尙埃滅。鉛槧寧復餘。〔西京雜記〕揚子雲常懷鉛提槧。訪殊古絕域語。以爲裨補。誰歟志氣銳。或者事功趨。數行史家紙。隨作黃土墟。吾誠不及

此。矯首嘆以歔。撥書寘牀上。所愧爲世儒。

飲酒

昔我不解飲。病來持一觥。一觥亦已醉。二豎敢相撓。〔左傳〕晉侯疾病。求醫於秦。秦伯使醫緩爲之。未至。公夢疾爲二豎。子曰。彼良醫也。懼傷我。焉逃之。其一曰。居肅之上。膏之下。若我何。

忽然秋毫大况乃泰華輕豈其陰陽足妄使龍虎爭

龍虎解見問五臟

冰蠶冰爲山

〔拾遺記〕東海圓嶠山有冰蠶長七寸有鱗角以霜雪覆之則爲繭五色絲

織爲文錦入水不濡入火不爛

火鼠火烘城

〔神異經〕南方有火山生不燼之木晝夜火然暴風不熾猛雨不滅火中有鼠重百斤毛長二尺餘細如絲恆在火中不出外而色白以水逐沃之即死取其毛織以作布用之若垢汙以火燒之即清潔

也。一元本同氣萬物卻異情機關有大運稟受通羣氓轉移苟不定顛倒尙何營百年定幾時愁賦空餘

聲。跼躄起自鑒面目吁可驚

〔莊子〕子輿有病子祀往問之曲偻發背上有五管頤隱於臍肩高於頂句贅指天陰陽之氣有疹其心閒而無事跼躄而鑑於井曰嗟乎夫造物者又將以予爲此拘拘也〔注〕病中勉行索照

其形也跼音癩躄同蹊行步欲危貌

試攀松樹枝復攬芝草莖但當盡此酒不在學長生

觀齊謝玄卿五洩山遇僊記寄題五洩山寺

〔宋濂五洩山水志〕南齊會稽人謝玄卿好呼吸延年之術年百歲精力不衰以採藥入山值一橫溪俯臨峻壁淙湍激溜上有石梁纔可

並足乃匍匐而渡稍聞鐘磬聲尋之而往忽遇仙女數人被服纖麗玄卿向前禮拜乃相視笑曰子非謝玄卿乎徐引之登峻嶺至一處豁然平敞玉堂朱閣女云此東華夫人所居也〔輿地志〕山峻而有五級故名五洩山〔水經注〕浙江合浦陽江東逕諸暨縣與洩溪合溪廣數丈中道有兩高山夾溪造雲壁立凡有三洩洩懸三十餘丈廣十丈中二洩不可至登山遠望乃得見之洩懸百餘丈水勢高急聲震水外上洩懸二百餘丈此是瀑布上人曰洩〔按〕志山在浙江紹興府諸暨縣

曩聞一奇士深入五洩行五洩何處所長溪遶崇岡微風生天籟急瀑洒石梁金磬竄欲響綺衣爛迴光

綺妓開朱閣。靈仙坐玉堂。僂儂卽進謁。裴裒遽鳴璫。幸汝得大藥。〔杜甫詩〕苦乏大藥資。〔注〕丹砂黃金爲仙藥也。於茲赴玄鄉。玄鄉

且留宴。穢臟勿發狂。高座瓊輝施。碧幃琳華張。芝英雜桂腦。〔瑞應圖〕芝英者王者親延者養老有道則生。〔列仙傳〕桂父象林人常服桂皮葉龜腦和之。螭髓

間鳳漿。〔續仙傳〕謝玄卿遇神仙見素麟脂斑螭髓。玄洲白奈空洞靈瓜。又有瓊飴酒。彈八琅之璈。吹叢霄之笙。擊洞陰之磬。又作回鸞轉鳳之舞。皆非世間之所有。〔漢武內傳〕王母謂帝曰。太上之藥。有風實雲子。玉津金漿。中華紫蜜。雲山朱蜜。冥陵麟

膽炎。山夜日扶桑。丹樞長河文藻。太真紅芝。九色鳳腦。有得食之。後天而老。此太上之所服。非衆仙之所寶也。太容揮四弦。王母彈八琅。羽旗素蜺駕。〔傅毅賦〕體如游龍。神如素霓。蜺同霓。〔說文〕屈虹

青赤或白。黼黻騰蛇驤。〔埤雅〕騰蛇龍類也。能興雲霧而遊其中。慎子曰。騰蛇遊霧。飛龍乘雲。雲罷霧除。與蚯蚓同失其所乘故也。眼珠便爽朗。肌骨遂馨香。日星恍在下。

海嶽極渺茫。嗟予頗探勝。古路但縱橫。青童邈不見。〔魏夫人傳〕夫人名華存。字賢安。幼而好道。有四真人來降。太極真人發排空之歌。青童吟太霞之曲。神王諷晨啓之章。清虛詠駕颺

之寶利。屹相望。〔諸暨縣志〕洩溪源自富陽山峽。下有東西兩龍潭。東龍潭即飛瀑處。有響鐵嶺。過嶺即富陽界。嶺曲一峯。轉而面南。峯下有五洩寺。西龍潭深入谷中五里許。未到潭一嶺爲浦江界。隨潭流北至寺前。與東潭水合。山勢轉而面

北。兩山夾潭。流東行。綿延十餘里。奇迹秀絕。山峯插烟霧。潭級跳冰霜。螻蝻小窟穴。蜉蝣亂飛揚。終然雲錦笈。雲錦笈。解。見泰山高。照以虎螫囊。

〔神仙傳〕安期先生乘駮驪。着朱衣。遠遊冠。帶玉珮。及虎頭螫囊。千年或頃刻。萬里忽扶桑。扶桑。解。見送鄭獻可。謝卿自獨往。矯首盍回翔。笑採金明草。浮顏

安可常。

〔廣異記〕謝玄卿至東嶽夫人所居有異草正黃色光可鑑日此金明草晉咸和九年東華青童賜魏夫人石精金光化形靈異〔白居易詩〕願食金光草壽與天齊傾

問五臟

我問昔生我繫胎果何神上顛下負趾。

〔靈樞〕天圓地方人頭圓足方以應

五臟交錯陳胎經已不足乳湮復不勻。

〔唐元德秀傳〕自

乳兄子數日流通瀆音

黔雷不我職。

〔前漢司馬相如傳〕左玄冥而右黔雷兮〔注〕黔雷天上造化神名

粉飾強爲人自宜多蓄害無以保命真元氣

日晷敗。晷讀若紫古通皆與疵同

客邪作艱屯。

〔素問〕夫邪氣之客於身也以勝相加

彼何瓠而肥言貌勇若震。

〔埤雅〕長而瘦上曰瓠大腹短頸曰瓠

此何黴而瘠。

肢骨弱不伸。

〔楚辭〕頽微黎以摧敗〔注〕面黑也〔說文〕物中久雨青黑也

嗟夫賦命間豈不汝由因我誠不汝慊羸嗇胡不均五精被我

惱。〔靈樞〕生之來謂之精此先天元生之精也食氣入胃散精於五臟此水穀日生之精也

訴我蒼蒼旻恍然欲我答天道汝當遵粵自汝有生躔次逆星辰

矧從汝生後殘賊逮汝身心兮本中居與汝相主賓。

〔素問〕心者君主之官也

汝何不祇敬狂役類風輪。

〔書〕日嚴祇敬六德〔楞嚴

經〕相待成搖故有風輪執持世界從妄見生山河大地諸有爲相

坎離漸遠行。

〔參同契〕易謂坎離坎離者乾坤二用〔解〕乾坤爲天地之象坎離爲陰陽之象天地非陰陽無以成造化之功乾坤非坎離無以施造化之妙

龍虎

起戰噴。〔又〕偃月法鼎爐。白虎爲癸樞。汞日爲流珠。青龍與之俱。〔箋〕坎形如偃月。水中出火。虎向水生。離性如汞。日火中生。水龍從火出。一元竟不守。散入萬微塵。惟脾制水穀。四體

承華津。看載噤汝口。〔禮〕左殺右載。酒漿絕沾唇。司祿不上計。周禮地官天府。若祭天之司民司祿。而獻民數穀。數則受而藏之。〔注〕司祿文昌宮第六星也。昇汝藜藿

貧。〔家語〕子路曰。昔者由也。事二親之時。常食藜藿之實。爲親負米百里之外。親死之後。南遊於楚。累茵而坐。列鼎而食。顧欲食藜藿爲親負米。不可復得也。饑腸常九回。苦吻添荆榛。何天不汝錫。服

用無箱困。〔詩〕乃求千斯倉。乃求萬斯箱。〔又〕不稼不穡。胡取禾三百困兮。抑汝弗事天。寢食失鼎茵。天本不病汝。汝實使病臻。汝仍不耐病。虛

躁復善墾。內虧但外養。衆藥聚毒芬。〔帝王世紀〕黃帝使岐伯嘗味草木。與醫療疾。今經方本草之書咸出焉。金石草木蟲。亂投劇斧斲。〔六書略〕斲本

矛柄。因音借爲矜憐之矜。五精恆不寧。乖沴積相熏。寒增熱或壯。頃刻異冰薪。當知汝五臟。獨不與汝親。何庸汝反詰。鬪

我似越秦。〔韓愈文〕越人視秦人之肥瘠。曾不加欣戚於其心。吁哉一臟損。五臟遽不醇。齒牙漸凋巖。〔方書〕凡病人齒無色。舌上白。喜睡。或下利。此惡蟲食下部。以竹筒一頭。

納餘竅中。一頭燒艾。入雄黃熏之。立愈。膚肉還削斲。〔說文〕皮細起。汝徒職汝職。軀殼有君臣。天曾盡賦汝。造化匪不仁。我聞五精

言。鑿鑿總有倫。曰人本之天。辟若泥在鈞。〔前漢董仲舒傳〕上之化下。下之從上。猶泥之在鈞。唯甄者之所爲。猶金之在鎔。唯冶者之所鑄。一時巧相值。萬物混無

垠。聖愚且同羸。羸與羸通。毛介與角麟。我惟有心肝。是號橫目民。橫目解見讀列子。心肝既屬我。榮衛盍網縑。靈樞人受氣於穀

入於胃。以傳與肺。五藏六府。皆以受氣。其清者為榮。濁者為衛。徧歷燥溼滑。備嘗酸鹹辛。虐汝重役汝。汝得我緇磷。蚯蚓尚無臟。靜夜解唱呻。蝴

蝶亦復然。翾飛媚陽春。彼寧心肝具。物性各有循。鏐納或土化。死生僅昏晨。自今我即安。無往不寵珍。忍

令百歲後。銷變為烟燐。博物志。鬪戰死亡處。人馬血積年化為燐。燐著地及草木如露不可見。行人觸之者。著體有光拂拭即分散。無數有細吒聲如燭豆。靜坐良久尋滅。後其人忽忽如失魂。經日乃差。曲肱便莞

簞。詩下。就口取臙臙。儀禮大夫公食禮。臙臙牛炙。注。五精速歸臙。大宅鑿靈氛。莊子生猶且也。死猶寄也。人生特寄宅於且。死則夜

而歸。張毅喜犇走。熱中果如焚。單豹好容顏。饑虎特汝隣。莊子田開之曰。開之夫子善養生者。如牧羊然。視其後者而鞭之。威公曰。何謂也。田開之曰。魯有單豹者。岩居而水飲不

與人共利。行年七十。而有嬰兒之色。不幸遇餓虎。食之。有服毅者。高門懸簿。無不走也。行年四十而內熱疾死。豹養於內。而虎傷於外。毅養於外。而疾攻於內。此二者者。皆不鞭其後者也。二者乃天道。我將何所云。作詩

示同黨。聊以博笑忻。

觀梁四公記。唐張說撰梁四公記。梁天監中有蜀鬪。觀杰。戮讎。仇腎四公。謁武帝。帝見之甚悅。蜀音攜鬪音琛。去聲。讎音萬。入聲。杰音桀。戮音蜀。讎音湍。仇音掌。腎音起。皆姓名也。

奇士自古有。我聞梁四公。來從何處所。遂到大江東。舉朝無留難。當辰亦動容。曾襟狹海嶽。舌頰翻雷風。

發揮衆女國。〔又〕杰公曰西北萬里有女國以蛇爲夫男則爲蛇不噬人而穴處女爲臣妾官長而居室司徒左長史王筠難之曰書傳所載女國之東蠶崖之西狗國之南羌之別種一女爲君無夫蛇之說何也公曰以今所知女國有六北海之東

有女國。天女下降爲君。國中有男女。西南板橋之西有女國。其女悍而男恭。女爲人君。以貴男爲夫。置男爲妾媵。昆明東南絕徼之外有女國。以猿爲夫。生男類父。而入山谷。晝伏夜遊。生女則巢居穴處。南海東南有女國。以鬼爲夫。夫致飲食禽獸以養之。勃律山之西有女國。方百里。山出合應之水。女子浴之。而有孕。其女舉國無夫。并蛇六矣。

充拓扶桑宮。

〔又〕杰公云東至扶桑蠶長七尺圍七寸色如金四時不死五月八日嘔黃絲布於條枝而不爲繭脆如繩燒扶桑木灰汁煮之其絲堅韌四絲爲係足勝一鈞

俄而扶桑使使貢方物有黃絲

巨鶩產駿逸靈貂披蒙茸。

〔又〕西有酒海其水味如酒北有漆海毛羽染之皆黑色西有乳海水白滑如乳三海間方七百里水土肥沃大鴨生駿馬有兔大如馬毛

潔白長尺餘有貂大如狼色純黑毛亦

非歟沈淵鼎。

解見李鐵槍本末

或者射日弓。

〔淮南子〕堯時十日並出草木焦枯堯命羿仰射十日中其九鳥皆死墮羽翼

至人

倘可遇天地那能窮孔姬著禮法。羸漢流橫縱淫辭一以詖幻術紛如蠶齊人頗志怪。

〔莊子〕齊諧者志怪者也

晉室

餘談空。

〔晉書〕何晏等祖述老莊立論以爲天地萬物皆以無爲本王衍等愛重之由是士大夫皆尙浮誕廢職業裴頠著崇有論以釋之

豈其羈狂獠。

獠音季狂犬

猶謂得象龍。

〔維摩經〕菩薩勢力譬

如龍象蹴踏非驢所堪。〔大智度論〕水行龍力大陸行象力大故負荷大法者比之龍象。

洞冥久不作。

漢郭憲著洞冥記

神異將無同。

漢東方朔著神異經

咄哉衆耳目千載多盲聾。

小至日觀三山林靈致日經作

〔唐會要〕開元八年中書門下奏開元新格冬至日祀園丘遂用小至日視朝〔名勝志〕越王山烏石山九仙山即郡城中三山也郡名三山以此今福建福州府〔書〕敬

致日永星火〔注〕敬致周禮所謂冬夏致日也〔按〕周禮馮相氏掌十有二歲十有二月十有二辰十日二十有八星之位辨其序事以會天位冬夏致日春秋致月以辨四時之敘

昔在江左國閩人有林靈白衣召上殿口誦致日經

〔高士傳〕鄭仲虞不仕漢章帝自往終不肯曰陛下何惜不爲上世君令臣得爲偃息之民詔以祿終其身號爲白衣尙書

卦

爻遽可驗聲樂洞吾冥燮調久不職民物將何寧前朝百喪亂四鄙長羶腥辟王眞贅旒

〔公羊〕君若贅旒然旒通作瘤

兵覺劇建瓴

〔前漢高帝紀〕譬猶居高屋之上建瓴水也〔注〕言其向下之勢易也

著龜強占決福極矧兆形

〔書〕五福六極

一元不汝體萬蟄安能醒

自今發孔壁茲欲論漢廷

〔前漢儒林傳〕伏生故爲秦博士孝文時聞伏生治尙書欲召時年九十餘老不能行於是詔鼂錯往受之秦時禁書伏生壁藏之兵起流亡求其書亡數十篇得二十九篇以教於齊魯之間由此學者

頗能言尙書

春秋紀苗害河洛推奧靈

〔易〕河出圖洛出書

日星本照耀川嶽恆流停犇騰狗吠野

〔柳宗元文〕僕往聞庸蜀之南恆雨少日日出則犬吠

播盪鯨翻溟

〔古今注〕鯨大者長千里小者數丈鼓浪成雷噴沫成雨〔孫綽賦〕長鯨嶽立以截浪

於世或間有匪天誰所令天功巧旋斡聖造務德刑勾

萌草芟甲

〔淮南子〕仲春之月天子命有司省囹圄去桎梏毋笞掠養幼小存孤獨以通勾萌〔禮〕季春之月生氣方盛陽氣發泄勾者畢出萌者盡達

翫毳鳥羽翎

〔書〕仲秋鳥獸毛毳仲冬鳥獸翫毛〔注〕毛毳毛落更生

潤澤鮮好也翫毛生與毳細毛以自溫也翫音元翫音先上聲

和風足氣運化景多年齡私疑彼磬錯

〔書〕錫貢磬錯

否者此鐘莛

〔前漢東方朔傳〕以莛撞鐘豈能發其音聲

徵冬卽花綻。羽夏因雪零。

〔史記〕徵爲事。羽爲物。〔注〕王肅曰。夏物盛。故事多。冬物聚。索隱曰。徵屬夏。夏時生長。萬物皆成形。體事下有體。故配事。絃用五十四絲。羽爲水。最清物之象。故爲物。絃用四十八絲。

陰陽

特揮霍。律呂暫聽。燹毋庸緹室琯。

〔後漢律歷志〕候氣之法。爲室三重。戶閉。塗墾周密。布緹縵室中。以木爲案。每律各一。內痺外高。從其方位。加律其上。以葭莖灰抑律內端。按律而候之。其爲氣所動者。其灰散。人及

風所動者。其灰聚。殿中候用玉律。十二。惟二至乃候。靈臺用竹律。

便叶茅堦。奠。

〔帝王世紀〕堯時有草生庭。十五日以前。日生一葉。以後日落一葉。月小盡。則一葉厭而不落。名曰莫莢。觀之以知旬朔。

嗟予偶撫卷。默

坐但空廳。亞歲肇歷數。

〔宋書〕魏晉冬至日。受萬國及百寮稱賀。因小會。其儀亞於歲朝。故稱亞歲。

祥雲滿郊坰。羲和不可作。

〔書〕乃命羲和。〔注〕羲氏和氏。主歷象授時之官。

蠹簡猶餘青。

〔唐書〕韓休語子曰。楊將軍不數年。門列畫戟。爾輩獨守蠹簡。學組繡對偶。比楊將軍遠矣。〔按〕楊謂楊素也。

董生尙爾溺。霆也吾鐫銘。

〔前漢書〕董仲舒治國。以春秋災異之變。推陰陽

所以錯行。

時儼

〔周禮〕夏官。方相氏。掌蒙熊皮。黃金四目。衣朱裳。執戈。揚盾。帥百隸。而時儼。以索室。毆疫。

古人重儼疫。時俗事禴禳。

〔周禮〕天官。女祝。掌以時招梗。禴禳之事。以除疾殃。〔注〕招以召祥。梗以禦穢。禴以會福。禳以攘禍。禴音禴。禳音攘。平聲。

歲陽欲改律。輿鬼寢耀鉞。

〔史記〕

輿鬼。鬼祠事。中白者爲質。〔注〕中星爲積屍。一名質。主喪死祠祀。

厲神乃恣肆。魃蜮并猖狂。

〔詩〕旱魃爲虐。〔神異經〕南方有人。長二三尺。袒身。目在頂上。走行如風。名魃。所見之國大旱。一名旱母。遇者得之。投溷中卽死。

〔詩〕爲鬼爲蜮〔說文〕

蜮短狐也。以氣射害人。

〔後漢禮儀志〕先臘一日大儺。謂之逐疫。選中黃門子弟年十歲以上。十二以下。百二十人爲儺子。皆赤幘皂製。執大鼗。方相氏黃金四目。蒙熊皮。玄衣朱裳。執戈揚盾。十二獸有衣

毛角。中黃門行之。穴從僕射將之。以逐惡鬼於禁中。〔東京賦〕爾乃卒歲大儺。毆除羣厲。方相秉鉞。巫覡操葯。儺子萬童。丹首玄製。

巫覡陳禁方。

〔周禮春官註疏〕男陽有兩稱。曰巫曰覡。女陰不變。直名巫。無現稱。一說男曰覡。女曰巫。〔前漢

郊祀志〕海上燕齊之間。莫不摠擊。而自言有禁方。能神僊矣。

虎頭眩金日。玄製炳赤裳。桃弧毆菑。豆礫斃瘡。剛八靈。悉震懼。六合高寒張。清

寧信不害。動靜維吾裳。世途頗險盪。

〔後漢書〕費長房能療衆病。鞭笞百鬼。汝南歲歲有彪。僊垂尾也。

人魅更跳梁。

〔後漢書〕費長房能療衆病。鞭笞百鬼。汝南歲歲有彪。僊垂尾也。作太守章服。詣府門。椎鼓郡中。患之時。彪適來。長房呵云。便

於中庭。正汝故形。即成老鼈。彪同魅。

狐鼠戴介幘。夔魑竊香囊。

〔應璩詩〕城狐不可掘。社鼠不可熏。〔列異傳〕中山王周南。正始中。爲襄邑長。有鼠衣冠出廳。事語曰。爾某日當死。周南不應。至期復出。冠幘絳衣。語曰。爾日中當

死。復不應。入復更出。日適中。鼠曰。周南。汝不應死。我復何道。遂顯蹶而死。即失衣冠。視如常鼠。〔前漢揚雄傳〕捐夔魑而扶獠狂。〔注〕木石之怪曰夔。夔神如龍。有角人面。耗鬼也。〔渚宮故事〕習鑿齒從桓溫出獵。時大雪於江陵城。西草上有氣出。伺一物射之。應絃死。

乃老雄狐。足上帶絳繒香囊。

煎熬到膏髓。擊剝成瘡瘍。乘風作國蠹。抵隙爲民殃。自從九鼎沒。誰使百怪藏。

〔左傳〕昔夏之方有德也。遠

方圖物貢金。九牧鑄鼎象物。百物而爲之備。使民知神。姦故民入川澤山林。不逢不若。魑魅罔兩。莫能逢之。

疥寒服褫帛。饑窶食罔糧。

〔前漢書〕宣帝讓趙充國曰。將軍士寒。手足戰。稼寧有利哉。〔注〕褫。音軍。坼。裂也。罔。音竹。

寒。創也。褫。音恥。〔說文〕奪衣也。罔。音卞。擊也。

蘆花蔽汝體。橡栗饑吾腸。地膚竟捲去。天孽俱凋傷。神荼欲呀啖。蟠木蔓不長。

〔東都賦〕守以蠶蠱。

神荼副焉〔注〕東海度胡山二神〔括地圖〕桃都山有大桃樹盤屈三千里。上有金雞日照則鳴下有二神一名鬱一名壘並執章索以伺不祥之鬼得則殺。蒙俱強顏貌枯竹無耿光〔荀子〕仲尼面如蒙俱〔注〕方相也

其首蒙其首蒙。聖言謂近戲五祀徒驚惶周禮春官大宗伯以血祭祭社稷五嶽〔注〕五祀五色之帝。惜哉六典廢〔周禮〕天官太宰之職掌建邦之六典以佐王治邦國曰治典教典禮典政典刑典事

述此時儺章。

和陶淵明詠貧士七首

長吟望天地宛轉無所依。豈不有達者窮櫛少光輝。此心未能信何力求奮飛。生雖百夫特。

〔詩〕惟此奄息百夫之特

死共一貉歸〔前漢楊惲傳〕秦時但任小臣竟以滅亡令親任大臣即至今耳古與今猶一丘之貉〔注〕言其同類也

行尋靈芝草不救歲晚饑〔高士傳〕四皓采芝歌曄曄紫芝可以療饑去矣

甌石竭〔前漢蒯通傳〕守儋石之祿〔注〕齊人名小甕爲甌受二斛〔又揚雄傳〕家無儋石之儲儋與甌通焉知溝壑悲。

二

大道忽已喪翻然念義軒。今我去之久十年躬灌園。

〔高士傳〕楚王聞於陵仲子之賢欲以爲相仲子之妻曰夫子左琴右書樂在其中矣結駟連騎所安不過容膝食方丈於前所甘不

過一肉今以容膝之安一肉之味而懷楚國之憂亂世多。青恐先生不保命也於是謝使者相與逃去爲人灌園。存者耿日月餘如飄風烟身名易汨沒文字勤磨研磨研何

所事先覺有遺言。楊朱談力命。列子亦稱賢。力命解見病起讀列子。

三

山日淒以夕。起彈綠綺琴。〔傳玄琴賦序〕蔡邕有綠綺琴天下名器也。清哉積雪曲。自昔無知音。〔宋玉諷賦〕臣常行僕饑馬疲。正值主人門開。主人出。獨有主人女在。欲置臣堂上。太

高堂下太卑。乃為蘭房奧室。止臣其中。中有鳴琴焉。臣援琴而鼓之。為秋竹積雪之曲。〔李白詩〕此江若變作春酒。壘麴便築糟丘。

臺。歐陽修啼鳥詩。獨有花上。敞衣時所棄。華駟衆爭欽。不有丈夫氣。徒為行路心。

四

上天無停曜。日月會降婁。〔爾雅〕降婁。奎婁也。〔注〕奎為溝瀆。故名降。山林少過轍。二鳥鳴相酬。亦有五采鳳。飛來為岐周。〔山海經〕丹

穴之山。有鳥五色而文。名曰鳳。首文曰德。翼文曰順。背文曰義。膺文曰仁。腹文曰信。〔國語〕周之興也。鸞鸞鳴於岐山。〔注〕鸞鸞。鳳雛也。姬公世不作。白屋多懷憂。〔家語〕周公居冢宰之尊。制天下之政。而伏下白屋之

士。〔前漢蕭望之傳〕今士見者。皆先露索挾持。恐非周公躬吐握之禮。致白屋之意。〔注〕白屋。白蓋之屋。以茅覆之。賤人所居。逢時倘一用。華士非吾儔。函谷空逐客。函谷。解見黑海青歌。〔通鑑〕秦始

皇十年。秦宗室大臣議曰。諸侯人來仕者。皆為其主遊間耳。請一切逐之。於是大索逐客。傅巖乃旁求。書恭默思道。夢帝賚予良弼。其代予言。乃奔厥象。俾以形旁求於天下。說築傅巖之野。惟肖。

五

人生自沈靜。豈得非意干。宜哉揚執戟。三世不徙官。

〔前漢書〕揚雄當成哀平間。王莽董賢皆爲三公。權傾人主。所薦莫不拔擢。而雄三世不徙官。

窮冬無完褐。

盡日止一餐。美芹終不獻。晨曝尙餘寒。

二語解見病起讀列子。

手種老松樹。蒼然霜雪顏。政爾有佳思。清風吾掩關。

六

舉世尙馳驚。飄如風中蓬。

〔埤雅〕蓬蒿屬。草之不理者也。其葉散生。遇風輒拔。說苑曰。秋蓬惡於根本。而美於枝葉。秋風一起。根且拔矣。是以君子務本也。

上書爭銜鬻。言語自稱工。

誰歟持清節。乃見楚兩龔。

〔前漢書〕兩龔皆楚人也。勝字君賓。舍字君倩。二人相友。並著名節。故世謂之楚兩龔。哀帝時。拜舍爲光祿大夫。數賜告。終不肯起。王莽居攝中。卒。莽既篡國。拜勝爲講學祭酒。稱疾不應。徵後二年。莽復遣使迎勝。勝稱疾篤。不飲食死。

遣使迎勝。勝稱疾篤。不飲食死。

黃塵隨手掃。白月與心同。

〔傳燈錄〕守清禪師有僧問。末後一句。師曰。塵中人自老。天際月常明。

有榮方覺辱。無屈豈求通。誓追遼海

鶴。插翅以相從。

〔續搜神記〕遼東城門華表柱。忽有白鶴來集。人或欲射之。鶴於空中歌曰。有鳥有鳥。丁令威。去家千歲。今來歸。城郭如故。人民非。何不學仙去。空伴冢壘。遂上冲天。

七

少小負奇志。常思觀九州。垂成捨冠冕。去結巢許儔。

〔高士傳〕巢父。堯時隱人。年老以樹爲巢。故號巢父。堯讓位於許由。由以告巢父。巢父責之曰。汝何不隱。汝形藏。汝光非吾友也。乃過

清冷之水洗其耳。樊仲父牽牛飲之。見
洗耳乃驅牛還。恥令牛飲其下流也。

朝餐秋柏實。

〔楚詞〕山中人兮芳杜若。飲泉石兮飯松
柏。〔列仙傳〕廣成子食柏實。商洛更生。

夕漱醴泉流。

〔禮〕地出醴泉。〔史〕
記〕崑崙有醴泉。

長貧士之常。獨往非我憂。

〔宋書隱逸傳〕夫獨
往之人。皆稟偏介之性。

求馬但得骨。尚能千金酬。

〔戰國策〕燕昭王使涓人齎千金市千
里馬於絕域。至而死。用五百金市其骨而

還。天下聞之。以王為好馬。於
是未期年。有獻千里馬者三。

日望芳草長。毋煩怨靈修。

〔楚詞〕余既不難夫離別兮。傷靈修之數化。〔注〕
靈修言其有明智而善修飾。蓋婦悅其夫之稱。

方景賢回聞吳中水滂甚戲效方子清儂言

客來自吳土。示我吳儂言。

〔六書故〕吳人謂人儂。即人
聲之轉。儂音農。俗謂我為儂。

吳儂歲苦水。謂是太湖翻。太湖四萬頃。三江下流洩。

〔書〕三江既入。震澤底定。〔注〕震澤。太湖也。即具區。三江。婁
江。東江。中江也。〔張勃吳錄〕太湖周行五百里。三萬六千頃。

疏淪久無人。淤汙與海絕。東風一鼓盪。暴雷如頽城。屋

扉蚌蛤上。畦吠魚龍爭。嘉種不得入。

〔詩〕誕降嘉種。惟
秬。惟秠。惟糜。惟芑。

種亦悉爛死。民事何所成。食天俱在水。

〔前漢酈食
其傳〕王者

以民為天。
以食為天。

富豪僅藏蓄。官府更急糧。貧窶徒羶餒。

羶。即
羶字。

妻子易徙鄉。散行向淮壩。

〔書〕導淮自桐柏。東會于
泗。沂。東入于海。壩音輓。平聲。

〔史記〕故盡河壩。
〔注〕謂緣河邊地也。

隨處拾稻粟。

〔晉書〕夏統採
稻求食。星行夜歸。

雖然遠鄉土。恐可完骨肉。東吳本富盛。數歲偶凋殘。世非欲

繭絲。〔左傳〕晉趙簡子使尹鐸為晉陽請曰以為繭絲乎。抑為保障乎曰保障哉。〔按〕繭絲賦民以自益也。

官曷任虎冠。〔前漢高五王傳〕太尉勃等盡誅諸呂大臣。議欲立齊王皆曰母家駟鈞惡戾虎而冠者也。

國家

自充實財賦有淵藪給復當我及安寧到雞狗何人講平準。

平準解見讀漢武內傳

何人議河渠。

〔史記〕天子自臨決河塞瓠子築宮其上名曰宣

房宮而道河北行二渠復禹舊迹而梁楚之地復寧無水災自是之後用事者爭言水利朔方西河河西酒泉皆引河及川谷以溉田而關中輔渠靈輒引堵水汝南九江引淮東海引鉅定太山下引汶水皆穿渠為溉田各萬餘頃佗小渠披山通道者不可勝言然其著者

在宜荒政固有典。

〔周禮〕大司徒以荒政十有二聚萬民一曰散利二曰薄征三曰緩刑四曰弛力五曰舍禁六曰去幾七曰省禮八曰殺哀九曰蕃樂十曰多婚十一曰索鬼神十二曰除盜賊。

水利復有書。

〔事紀

原〕水利沿革曰井田廢溝澮湮水利所以作也。通典曰魏文侯使李悝作水利此水利之始也。

龍蛇方未毆鴻鴈尚在澤。

〔左傳〕深山大澤實生龍蛇。〔詩〕鴻鴈于飛集于中澤。

縱令可還定何

計免溝壑何時水幸退我得刈稻禾水退泥盡出草屨更撈蝦。

〔炙轂子〕夏商以草為屨〔王維詩〕不如農家任挑達草屨撈蝦富春渚。

我思告朝

廷來歲不可待毋庸水爭地便放江達海客今聽我言我欲解儂憂所爭但一水民氣庶今瘳自從唐季

來吳越無兵械。

〔蘇軾表忠觀碑〕三世四王與五代相終始天下大亂豪傑蜂起方是時以數州之地盜名字者不可勝數既覆其族延及無辜罔有子遺而吳越地方千里帶甲十萬鑄山煮海象犀珠玉之富甲於天下然終不失臣節貢獻相

望於道是以其民至於老死不識兵革四時嬉遊歌舞之聲相聞至於今不廢。

至於宋南徙淮蜀此都會大田連阡陌居第擬侯王錦衣照車騎玉食溢

酒漿居然甲東南遂以侈濟侈培克自此多。

〔詩〕會
是培克。

凋瘵亦以起天寧不汝恤有此水潦淫要令沃土

瘠民得生善心。

〔國語〕敬姜教子曰昔聖王之處民也擇瘠土而處之勞其民而用之故長王天下夫民勞則思思則善心生逸則淫淫則忘善忘善則惡心生沃土之民不材淫也瘠土之民莫不向義勞也。

豈惟生善心。

且用戒培克采詩觀民風願踵太史職。

〔禮〕命太史
陳詩以觀民風。

蜂分

〔陰陽變化錄〕蜂有將蜂相蜂蜂王王大如小指王之所在蜂不敢螫無王則羣死遇有二王即分分之時老王遜位而

出所分之蜂均挈其半從王而出者飛止必環衛王皆有隊伍行列每日兩衙應潮上下化書言蜂有君臣之禮是也〔又〕羣蜂出採百花釀上粉置兩跨歸釀其黃色細腰腰僅相屬不能為蜜曰穉蜂淮南子以為貞蟲〔陸佃曰〕細腰蜂作房在樹及屋簷房皆倒懸處必以黍房中各有子如粟稍長如蛹能動逐時飼之久則封之生翼而出復字卵則增房房數百層

子多
至石

白日照我牖羣蜂亂飛颺胡然立國邑意各擅侯王細腰峙窟宅修股負糒糧搜尋百花叢吮飲靈露漿

長雄據要劇孫子孕蕃昌班茅寧建社。

〔禹貢註〕諸侯受命于周乃建大社于國中將建諸侯鑿取其方面之土苞以黃土苴以白茅以為土封。

妮隊欲殊彊。

〔唐書〕
康傳圭發

土團赴代州至城北妮隊不發妮音錯謹貌又整也。

秦年賤親戚彊壯邊分張。

〔通鑑〕始皇二十六年丞相王綰等請立諸子為王廷尉李斯曰周封子弟同姓甚衆然後屬疏遠相攻擊如仇讎天子弗能禁今海內一統皆為郡

縣諸子功臣。以公賦稅。重賞賜之。甚足易制。天下無異意。則安寧之術也。置諸侯不便。始皇從之。分天下爲三十六郡。〔又〕博士淳于越曰。殷周之王千餘歲。封子弟功臣。自爲枝輔。今陛下有四海。而子弟爲匹夫。卒有田常六卿之臣。何以相救。始皇下其議。李斯言五帝不相復。三代不相襲。越言乃三代之事。何足法也。〔又〕二世元年。殺諸公子十二人。

唐朝富丁口寬狹或徙鄉。

〔又〕高祖武德七年。定均田租庸調法。丁中之民。給田一頃。篤疾減十之六。寡妻減七。皆以什之二爲世業。八爲

口分。每丁歲入租粟二石。調隨土地所宜。綾絹絲布。歲役二旬。不役。則收其備。日三尺。有事而加役者。旬五日。免其調。三旬租調俱免。水旱蟲霜爲災。什損四以上。免租損六以上。免調損七以上。課役俱免。嗟茲大寰內。壹是爭閱場。

物生豈不微。翾擾迺其常。

〔荀子〕喜則輕而翾。〔注〕輕薄巧慧也。翾音喧。

龍伯數千丈。巨軀果何藏。

〔列子〕龍伯之國。〔河圖玉版〕崑崙北九萬里。龍伯國人長三十丈。萬八

千歲。鵠人僅七寸。么麼具冠裳。

〔述異記〕西海外有鵠國。人長七寸。自然有禮。好經綸拜跪。日行千里。百獸不犯。惟畏海鵠。鵠見必吞之。在鵠腹中不死。鵠一舉亦千里。

肖翹本殊異。性命可

比方。

〔莊子〕上悖日月之明。下爍山川之精。中墮四時之施。惛冥之蟲。肖翹之物。莫不失其性。〔注〕惛冥。微息而動之物。蝸牛之屬也。肖翹。輕飛之物。蛾蝶之屬也。言乖戾之氣。感召如此。

中心苦見役。外患復難防。當

時一割裂。在處幾披猖。栝圈眞醜毒。

〔左傳〕成季使以君命。命偕叔待于鍼巫氏。使鍼季醜之。醜音鳩。鳩鳥羽有毒。以畫酒飲之。則死。

突奧發刀槍。

突奧。解見送鄭獻可。

龍號聲

殷雷。虎鬪齒。嚙霜。紛紜彼楚漢。

〔通鑑〕項羽自立爲西楚霸王。王梁楚地九郡。都彭城。立沛公爲漢王。王巴蜀漢中。都南鄭。羽又與漢約中分天下。鴻溝已西爲漢。以東爲楚。按彭城。今徐州。南鄭。今屬漢中府。鴻溝。在開

封府河。陰縣。

彷彿此燕涼。

〔按〕十六國春秋。燕慕容廆傳四世。滅於秦苻登。苻堅滅於西燕慕容冲。冲傳三世。滅於後燕慕容垂。垂傳二世。滅於魏慕容熙。熙又弒於北燕高雲。南燕慕容德傳二世。滅於宋主劉裕。前涼張軌傳九世。滅於秦。西涼

李嵩傳三世滅於北涼沮渠蒙遜南涼禿髮烏
孤傳四世滅於後涼呂光傳四世滅於後秦
虻螳尙有知槐擅互相攘〔南柯記〕東平淳于棼所居宅南有大古槐一株夢
醉臥其下夢入槐穴中見大城朱門重樓題曰大槐安

國入門升殿見王王以女金枝公主妻之出爲南柯郡太守時有檀羅國者來伐是郡王命棼練將訓師以征之將兵三萬拒賊於瑤臺
城敗績後棼寤驚駭尋槐下穴宛如夢中所經入處遂以斤斧斷擁腫折查斫尋穴究源有大穴洞然明朗積土壤爲城郭之狀有蟻數
斛聚其中中有二大蟻長可三寸左右大蟻數十輔之是其王矣即槐安國都也又窮一穴亦有土城羣蟻處其
中即南柯郡也因念檀羅征伐事再訪跡於外宅東有大檀樹一枝旁有小穴亦有羣蟻隱聚其中即檀羅國也

穴枯桑〔詩〕螟蛉有子蜾蠃負之〔箋〕螟蛉桑蟲蒲盧取桑蟲子負持去
胸媪養之以成己子爾雅蜾蠃蒲盧〔注〕細腰蜂也蜾蠃音果羅
天機久已洩世網孰爲綱委形混衆萬觀

物詎能詳歲寒野草死寒菊弄餘芳羣蜂我爾恤矯首慨以慷

題天台山張節婦卷

古人重首教夫婦係民彝自從初御輪〔禮〕婿奠雁降出御婦車而
婿受綏御輪之周先俛于門外禮有親結褵〔詩〕親結其
褵九十其儀百年主家室

中饋務唱隨〔詩〕之子于歸宜其家室〔易〕無攸遂在中饋
溘先苟不待從一幸無虧〔楚詞〕寧溘死以流亡兮溘音堪入聲奄忽也〔禮〕
婦人無專制之義有三從之德在家從父適人從夫夫死

從子世途日趨下貞節誰肯持於焉見菅蒯〔左傳〕雖有
絲麻不遺菅蒯早歲哭總帷〔魏略〕太祖臨終遺令施總帳于臺上〔陸

機弔魏帝文〕悼總帳之冥漠〔謝玄暉詩〕

總帷飄井幹〔按〕總
細布而疏爲靈帳裙
茶毒守几席〔詩〕寧
惡筭毀容儀〔禮〕女子十五而笄〔檀弓註疏〕吉
筭長尺二寸齊衰筭長尺惡筭或用櫛
旦夕執醕奠春秋

〔禮〕女子十五而笄〔檀弓註疏〕吉

動悲思。病姑坐堂上。躬養我卮匱。稚孩倚床側。慈訓我書詩。奉老當以終。撫孤敢如遺。白頭誓不爽。黃土詎有知。我生何惻惻。我死迺吾期。惜哉歡娛際。捐我少艾時。鸞鏡塵已蝕。〔范泰鸞鳥詩序〕鬪賓王欲鸞鳥鳴。夫人曰。何不懸鏡照之。鸞鳥睹影而鳴。

一奮而絕。〔楊炯詩〕風

斂金作縷。鸞鏡玉爲臺。

錦衾淚還縹。〔詩〕角枕粲兮錦衾爛。兮余美亡此誰與獨處。

史管獨不焯。〔詩〕形管有焯。

春裳忍爲私。因之念三季。似

此實女師。谷風或棄背。

〔詩序〕谷風。刺夫婦失道也。

行露且陵欺。

〔詩序〕行露。召伯聽訟也。

詠歌可勸諷。開卷益嗟咨。從來桑濮地。不

廢柏舟辭。

〔詩序〕桑中刺奔也。〔禮〕桑間濮上之音。亡國之音也。〔詩序〕柏舟共姜自誓也。

小園見園丁縛花

我嗟衆草木。高出陵雲端。叢生或滿地。品彙可不完。山園我栽蒔。作此小屈蟠。龍頭何其蠢。鳳翼乃若干。

胡然贊化育。任意騁雕剜。勾萌欲旁達。

勾萌。解見致日經。

節目終液構。

〔莊子〕匠石曰。散木也。以爲器則速毀。以爲門戶則液構。〔注〕液。津液也。構。謂脂出。構。槁然。

榮

迴挾煙彩。刻剝獻雨癥。立身旣不直。生理寢凋殘。春陽彼一時。花發黃白丹。歌謳雜舞吹。酒炙飲栝柮。歲

晚忽焉至。北風吹汝寒。皮膚早蝟蝕。

〔爾雅〕蝟。蝟蝟。〔注〕木中蠹。晉曷。

骨髓思枯乾。聖人治天下。萬國無不謹。視民本如傷。

動植總相安。刑名威雪雹。劍戟血波瀾。廟堂苟失策。閭里轉窮殫。彼哉彼園子。此况儻爾冠。人生但心勦。

〔孟子題辭〕心勦形瘳。
〔說文〕勞也。焦上聲。

若處得體胖。我方即移汝。前有蒼蘚壇。世非郭橐駝。何以垂鑒觀。

〔柳宗元種樹郭橐駝傳〕郭橐駝不知始何

名。病僂。隆然伏行。有類橐駝者。故鄉人號之橐駝。業種樹。或移徙無不活。且碩茂。蚤實以蕃。有問之。對曰。橐駝非能使木壽且孳也。能順木之天。以致其性焉耳。

送鄭浚常北游京師

〔原注〕浚常。浦江人。其家自中素處士。綺至今九世同居。人以一家三代稱焉。

治世日少事。朝廷正求賢。信哉男兒志。觀此萬里天。一行本不易。當路即翩翩。親朋送糗糒。儻從戒舟船。

〔唐封常清傳〕奏儻從三十人。儻音欠。說文。從也。

自裁適時服。年貌逞餘妍。起吟俠游傳。賓客務相先。

〔史記游俠傳序〕今游俠其行雖不軌于正義。然其言必信。其行必果。已諾必誠。

不愛其軀。赴士之困厄。既已死生存亡矣。而不矜其能。羞伐其德。蓋亦有足多者焉。〔前漢游俠傳序〕周室既衰。陵夷至于戰國。列國公子。魏有信陵。趙有平原。齊有孟嘗。楚有春申。皆藉王公之勢。競爲游俠。皆以取重諸侯。顯名天下。搃擊而游談者。以四豪爲稱首。〔又〕郭解之倫。以匹夫之細。操生殺之權。其罪已不容于誅矣。觀其溫良泛愛。振窮周急。謙退不伐。亦皆有絕異之資。惜乎不入于道德。苟放縱于末流。殺身亡宗。非不幸也。〔又〕王莽時。諸公之間。陳邇爲雄。閭里之俠。原涉爲魁。功名抗雲表。氣槩

貫斗躔。心馳上谷塞。

〔通鑑〕天下冠帶之國七。而秦。趙。燕。邊于夷狄。諸戎亦各分散。自有君長。莫能相一。後秦滅義渠。始于隴西。北地。上郡。築長城以拒胡。趙破林胡。樓煩。築長城。自代並陰山下。至高闕爲塞。置雲中。雁門。代郡。燕破東胡。自

造陽至襄平。置上谷。漁陽。右北平。遼東郡。〔按〕志。今順天保定。河間等。

望極黃河壩。

黃河。解見送宣彥昭。

向來全燕地。碣石遠相連。

碣石。解見觀秦丞相碑。

只今帝王都。闔

闔儼在前。嵯峨廣寒殿。〔禁扁〕萬歲山下曰仁智山上曰廣寒俱元殿名。 嶠嶠神嶽巔。嶠音葛。嶠音孽。 金陂水流雪。翠嶼花滿烟。楊柳十二街。

十二街解見。人家競鞦韆。解見鞦韆行。 騏驥八尺龍。〔周禮〕馬八尺以上為龍。七尺以上為騏。六尺以上為馬。 官曹耀鞍韉。熒煌許霍勢。〔前漢外戚傳〕孝宣皇

二月六日篇。后父許廣封平恩侯。位特進。廣漢弟舜為博望侯。延壽為樂成侯。宣帝復以延壽為大司馬車騎將軍輔政。元帝復封延壽子嘉為平恩侯。亦為大司馬車騎將軍。〔又霍光傳〕武帝遺詔封光為博陸侯。昭帝子光子禹及兄孫雲皆中郎將。雲弟山奉車都尉侍中。昆弟諸

壻外孫皆奉朝請。為諸曹大夫騎都尉侍中。光病篤。宣帝拜光子禹為右將軍。又封雲為冠軍侯。禹嗣為博陸侯。燦爛春嘗權。見上。 傾身漸風動。炙手遽電燧。杜甫詩。炙手勢可熱。 奏書善

街鬻。希寵巧攀緣。匪文說禮律。伊武學兵鉞。牛毛豈不多。麟角獨爾專。二語解見胡仲申至。 屠狗或隱市。〔史記〕荆軻之燕愛燕之狗

屠及善擊筑者高漸離。荆軻嗜酒。日與狗屠及高漸離飲于燕市。酒酣以往。高漸離擊筑。荆軻和而歌于市中。相樂也。已而相泣。旁若無人者。燕有田光先生亦善待之。知其非庸人也。〔莊子〕夫千金之珠必在九重之淵。驪龍頷下。能

得之者。遭其睡也。世方重孝義。瓜瓞况綿延。〔詩〕綿綿瓜瓞。民之初生。 家規既建立。門榜復旌蠲。族居且百口。僮指亦及千。詳見送鄭

貞。跡茲乃政令。得不貴貂蟬。〔前漢劉向疏〕王氏一姓。乘朱輪華轂者二十三人。青紫貂蟬。充盈輦內。魚鱗左右。 吾知魯儒生。文物但炳然。美哉萬石君。惇

樸最可傳。〔又萬石君傳〕石奮無文學。恭謹無與比。孝文時。為大中大夫。孝景即位。以奮為九卿。奮長子建。次甲。次乙。次慶。皆以馴行孝謹。官至二千石。景帝曰。石君及四子皆二千石。人臣尊寵。乃舉集其門。凡號奮為萬石君。〔又〕萬石君以孝謹聞乎

淵 穎 集 卷二

五七

郡國雖齊魯諸儒質〔又終軍傳〕軍從濟南當詣博士步入關關吏予軍繻軍問以此何爲吏曰爲復傳還當以合符軍曰大丈夫西游終不得復傳還棄繻而去軍爲謁者使行郡國建節東出關關吏識之曰此行皆自以爲不及也須令便繻乘

使者迺前〔五代史〕晉桑維翰初舉進士主司以桑與喪同有勸不必舉進士者維翰著日出扶桑賦又著鏡視示人曰視徹則改卒舉進士及第棄繻生也勿直待硯穿歸乘使者傳踏卻別時筵

嗟予日以倦一夕三四遷病餘兩足弱無異夔憐虺〔莊子〕夔憐虺虺憐蛇治田徒欲疏〔前漢高五王傳〕朱虛侯章忿劉氏不

得職請爲太后言耕田太后曰試爲我言田意〔書〕肇牽車牛遠服買服買特肇牽里閭不過此磨滅疇能鑄

同喻國輔題人溫日觀蒲萄〔遂昌山樵雜錄〕宋僧溫日觀居葛嶺瑪瑙寺人但知其畫蒲萄不知其善書也今世蒲萄多贗其枝葉鬚梗皆草書法也

佛者本西域〔周書異記〕周昭王二十四年四月八日山川震動有五色光入貫太微太史蘇由奏曰有大聖人生於西方一千年外聲教及此此即佛生之時也〔後漢書〕漢明帝夜夢金人長丈餘身有日光飛空而至以問羣臣有通事舍人傅毅

對曰臣聞西域有神其名曰佛其形長丈六尺而黃金色輕舉能飛陛下之夢得毋是乎〔前漢書〕蒲萄出大宛張蒲萄亦來西〔前漢書〕西域始得其種以歸奈何此善畫無或渠所攜我曾考

其故初與漢使偕〔後涼錄〕龜茲國胡人奢侈家有至千斛蒲萄漢使取實來種於離宮別館之傍上林乃有館上林解見黑海青葱嶺何須梯〔前漢書〕西域以孝武時始通東則接漢阨

以玉門關西則限以葱嶺其南山東出金城與漢南山屬焉〔注〕葱嶺其山高大上悉生葱故名天時自不同地氣忽以迷結子且磊磊懸藤更高低先幾日已露

薄德不及稽。終令白氈像。遠從雙狡狴。

〔南史〕高昌國有草。其實如繭。繭中絲如細續。名白氈子。國人取織爲布。甚軟白。〔大藏一覽〕後漢明帝遣博士王遵等十八人往西域迎佛法。至月氏國。遇二梵

僧帶白氈。畫釋迦像。氈音牒。或省作疊。〔按〕楞嚴經言白疊巾。即此布所爲。〔杜甫詩〕光明白氈巾。〔爾雅〕狡狴食虎豹。蘇軾詩。西方真人誰所見。衣被七寶從雙狡。狡音酸。狴音倪。

從茲故國木。伴爾禪家栖。幽心

恍有得。爛墨研爲泥。宜哉一揮灑。遽若無町畦。依稀可少辨。變作天投蜺。

〔後漢楊賜傳〕春秋讖曰。天投蜺。天下怨海內亂。〔注〕霓者。斗之亂精也。

失度故 萬古空朔色。南山竟朝隲。〔詩〕南山朝隲。

畫工尙逸品。游戲徒筌蹄。

〔莊子〕筌者。所以在魚。得魚而忘筌。蹄者。所以在兔。得兔而忘蹄。〔注〕筌。取魚竹器。蹄。兔置也。

豈伊吾無人。何往非毫倪。豈伊吾無物。桃李總成蹊。

〔前漢李廣傳贊〕謠曰。桃李不言。下自成蹊。

此皆外所產。敢與中州齊。爲爾撫

此卷。長歌欲驚嘶。

觀莆田劉公掖垣日記後題

炎正昔中潰。王者遂南服。四明有史氏。三世秉國軸。

〔鄞縣志〕四明山。高萬八千丈。周圍八百里。有七十二峯。今屬浙江寧波府。〔按〕宋史。孝宗隆興元年。侍御史王十朋論史浩懷奸

誤國等八罪。罷知紹興府。寧宗嘉定十七年。史彌遠矯詔立王子貴誠。更名昀。是爲理宗。彌遠獨相。凡二十六年。封會稽郡王。理宗嘉熙三年。以史嵩之爲右丞相。兼樞密使。督視兩淮四川。湖軍馬。

人君恩稠疊。祖父勢熏熇。傾

家幾攀附。快意卽誅戮。幸茲遭大變。何苦圖起復。

〔宋史〕理宗淳祐四年。史嵩之以父病謁告。許之。史彌遠卒。詔史嵩之起復。右丞相。兼樞密使。中外莫敢言。於是太學生黃僂伯等百四十

四人。武學生翁日善等六十七人。京學生劉時舉等九十四人。宗學生與寰等三十四人。叩閣上書。不報。諸生乃榜於太學齋廊曰。丞相朝入。諸生夕出。諸生夕出。丞相朝入。時議欲逐遊士。諸生聞之作捲堂文。辭先聖以出。將作監徐元杰。司諫劉漢弼俱上言。願聽嵩之終

喪帝。雖然承天寵。詩。何天。得不覆公餗。〔易〕鼎折足覆公餗。諫官奏疏上。胄子伏關哭。所當終衰絰。〔喪服記〕衰長六寸。博四寸。〔檀弓〕

經也者。實也。〔注〕麻在首在要。皆曰經。分言之。則首曰經。要曰帶。經之言實。明孝子有忠實之心也。弗許覲黃屋。黃屋。解見觀秦丞相碑。時惟我劉公。草制方僂宿。掖垣備日記。

宸聽煩再瀆。〔宋史〕理宗淳祐四年。以劉漢弼為左司諫。時史嵩之。久擅國柄。帝亦患苦之。漢弼首贊帝曰。拔去陰邪。庶可轉危為安。否則是非不兩立。邪正不並進。陛下雖欲收召善類。不可得矣。帝嘉納之。因太學生上書。又上言。願聽嵩之終喪。亟選

賢臣以定相位。〔隋書〕薛道衡中書省有盤石。常據以草制。〔事實〕宋翰林為內制。中書為外制。〔見聞錄〕御史舊例。初入臺陪直。比五日。衆官皆出。此人獨留。曰。豹直。〔唐志〕僂直。一作豹直。亦曰伏豹。取不出之義。音報。〔易〕再三瀆。相門恆出

相。耕釣亦可卜。〔書〕枚。國事非家事。孝忠同一躅。北風吹天地。滄海翻岳瀆。浩也議不戰。長江境彌蹙。

〔通鑑〕宋孝宗銳意恢復。張浚入見。乞即日降詔。幸建康。帝問史浩。浩曰。先為備守。是為良規。議戰議和。在彼不在此。倘聽淺謀之士。時興不教之師。寇退則論賞以邀功。寇至則斂兵而遁跡。取快一時。含冤萬世。及退。詰浚曰。帝王之兵。當出萬全。豈可嘗試以圖僥倖。

彼嵩乃絃張。名闔將鹿逐。夾攻既通使。核算豈遺鏃。指麾及燕晉。洗蕩到瀟穀。〔宋史〕理宗紹定五年。以史嵩之為京湖安撫制置使。知襄陽府。

蒙古遣王機來京湖議夾攻金。嵩之以聞。朝廷皆以為可遂復仇之策。帝命嵩之報使許之。蒙古都元帥塔察兒。使王機至襄陽。約攻蔡州。嵩之先以兵會伐唐州。金將烏古論黑漢戰死。城降。嵩之命孟珙。江海帥師二萬。運米三十萬石。赴蒙古之約。塔察兒大喜。益修攻具。

端平元年孟珙以蒙古兵入蔡州。金主守緒及其尙書右丞完顏忽斜虎死之。金亡。嵩之露布以聞。遣郭春按循故壤。詣奉先縣沮掃祖宗諸陵。前漢董仲舒傳。琴瑟不調。甚者必解絃而更張之。乃可鼓也。前漢書。古王者之遺將也。跪而推轂曰。闔以內寡人制之。闔以外將軍制之。又。帝問副徹曰。若敦淮陰反乎。對曰。然。秦失其鹿。天下共逐之。高材疾足者先得焉。過秦論。秦無亡矢遺鏃之費。而天下諸侯已困矣。按。志。燕今直隸順天。晉今山西灑水名。在河南穀城縣。禹貢。伊洛瀍澗。春秋。公會齊侯于穀。兵威偶小振。相業竟難續。宋史。史嵩之服除。有進用之意。殿中侍御史章瑛。正言李昂英。監宴安爾江沱。左傳。宴安酖毒。不可

懷也。顛擅我姑孰。通鑑。晉元帝永昌元年。王敦舉兵反。陷長沙。明帝太寧元年。敦謀篡位。諷朝廷徵己。帝手詔徵之。敦移鎮姑孰。自領揚州牧。又。桓玄舉兵反。入建康。出屯姑孰。大政皆就焉。人材遽如此。王氣

合終錄。庚信哀江南賦序。將非江表王氣。終於三百年乎。從來論國是。獨不懼國覆。蓋棺久自定。晉書。劉毅云。荆棘忽蔽目。又。索靖知

天下將亂。指洛陽宮門銅駝。嘆曰。會見汝在荆棘中耳。望斷八公山。又。苻堅大舉入寇。詔謝石。謝玄。帥師拒之。去洛澗五十里。而軍堅登壽陽城。望之。見晉兵部陳嚴整。又望見八公山草木。皆以爲晉兵。憮然有懼色。曰。此亦勦敵。何謂弱也。

功高九州督。通鑑。桓溫子玄。補義興太守。嘆曰。父爲九州牧。兒爲五湖長。棄官歸國。回首百年間。遠哉遷固錄。史記。太史公曰。先人有言。自周公卒。五

能紹明世。正易傳。繼春秋。本詩書禮樂之際。意在斯乎。意在斯乎。小子何敢讓焉。前漢書敘傳。漢紹堯運。以建帝業。至於六世。史臣乃追述功德。私作本紀。編於百王之末。廁於秦項之列。太初以後。闕而不錄。故探纂前紀。綴輯所聞。以述漢書起於高祖。終於孝平。王莽之誅。十有二世。二百三十年。綜其行事。旁貫五經。上下洽通。爲春秋考紀表志傳凡百篇。

大食餅

〔格古論〕大食密銅身用藥料
燒成五色有香爐花瓶盒子之類

西南有大食國自波斯傳

〔唐書〕大食國本在波斯之西大業中有波斯胡人牧豕於俱紛摩地那之山忽有獅子人語謂之曰此山西有三穴穴中有黑石白文讀之便作王位胡人依言果見穴中有石及稍刃甚多上有文教

其反叛於是糾合亡命遂
割據波斯西境自立為王

茲人最解寶厥土善陶埴

〔老子〕埴埴以為
器埴音糧和土也

素餅一二尺金碧燦相鮮晶瑩龍宮獻

錯落鬼斧鐫粟紋起點綴花穉蟠蜿蜒定州讓巧薄印邑鬪清堅脫指滑欲墮凝瞳冷將穿逃哉賈胡力

〔後漢馬援傳〕伏波類西域
賈胡到一處輒止以是失利

直致鮫鰐淵常嗟古器物頗為世所捐襍衫易冠冕盤盎改豆籩禮圖日以變戎

索豈其然

〔左傳〕疆以戎索〔注〕大原近戎而
塞不與中國同故疆理土地用戎之法

在時苟適用重譯悉來前

〔禮〕東方曰寄南方曰象西方曰狄鞮北
方曰譯〔注〕四者皆通遠人言語之官譯

釋也猶言騰也謂以彼此言語相

騰釋也越裳氏重九譯而朝是也

大寰幸混一四海際幅員縣度縛繩紉

〔後漢章帝紀〕跋涉縣度〔注〕西域傳曰
縣度者石山也溪谷不通以繩索相引而度

娑

夷航革船

〔舊唐書〕東女國西羌之別種俗以女為王其王
所居名康延川中有弱水南流用牛皮為舩以渡

鑿空發使節

〔史記〕張騫鑿空其後使往者皆稱博望侯以為
質於外國外國由此信之〔注〕鑿空開通也騫開

通西域道

隨俗混民編漢玉堆積笥蕃羅塞鞍轡城池信不隔服食奈渠遷輪囷卽上據鼎釜疇能肩插葩奪

豔冶盛酪添馨羶。當筵特見異博識無庸詮。藏之或論價。裹此猶吾氈。珊瑚尚可擊。磧路徒飛烟。

〔杜甫詩〕今

君渡沙磧。繫月斷人烟。

〔注〕鹵中沙漠也。

彼還彼互市。我且我栝圈。角貓獨不出。記取征西年。

〔元史〕太祖西討回國。滅之。至東印度。駐鐵門關。有一角獸。鹿形。馬尾。色綠。作人言。

謂侍衛曰。汝主宜早還。帝以問耶律楚材。對曰。此瑞獸。名角端。能言四方語。好生惡殺。此天降符以告陛下。陛下天之元子。願承天心。以全民命。帝即日班師。猶一作端。或作端。

樓光遠家觀宋綬景德鹵簿圖

〔玉海〕景德二年郊祀。王欽若上記三卷。頗疏略。天聖六年十一月癸卯。翰林學士宋綬。上天聖鹵簿記十卷。付祕閣。初綬攝太僕卿。侍玉輅。上問儀物典故。占對辨洽。因命撰

記。景祐五年。禮儀使宋綬。上景祐南郊鹵簿圖記十卷。圖記序曰。皇上再郊之明年。命華光侍臣圖寫大簿。臣充儀仗使。督攝容衛。又以太僕奉車承顧問。乃與侍讀馮元。侍講孫奭議曰。前二圖書。寫形紀事。不相參會。盍象設而又文陳乎。由是著爲圖記十篇。〔五祀精義〕鹵。大盾也。以大盾領一部之人。故言鹵簿。〔漢官制度〕天子出車。駕次第。謂之鹵簿。〔按〕景德宋眞宗年號。天聖景祐俱宋仁宗年號。

東朝盛文物。四海極豐富。紛飾郊祀間。馳驅漢唐舊。奉常夙有掌。鹵簿列前後。

〔唐六典注〕漢官儀鹵簿篇。太常駕四馬。主簿前車八乘。

車輪麾飛黃。

〔西京雜記〕儀衛有騎隊。鼓吹。黃麾騎。臯。罕。節。御馬。華蓋。剛鼓之制。

戟盾服錯繡。

〔晉輿服志〕兵器則有大戟楯。〔玉海〕開寶四年。合祭天地於圓丘。始用繡衣鹵簿。〔按〕開寶。宋太祖年號。

啓胙

龍虎動。

〔左傳〕齊莊公伐晉。兵有啓有胙。〔注〕左翼曰啓。右翼曰胙。胙音祛。〔唐儀衛志〕大駕鹵簿。以旗計者二十七。曰青龍。白虎。辟邪。應龍。玉馬。三角獸。黃龍。白圖。黃鹿。飛麟。馱。鸞。鳳。飛黃。麟。角端。赤熊。兕。太平。犀牛。駿。鸚。驪。騶。牙。蒼烏。白狼。龍。馬。金。

牛、衙門旗、并黃廳、玄武
幢絳廳、孔雀旄、罕畢

扈衛鴛鴦筵

筵解見送
鄒獻可

嵯峨屹丘岳、灼爨羅星宿

〔玉海〕千乘岳動、萬騎林
迴星陳而天行雷震而霧合

陳兵吉利隊、擇

馬駒駱廐

〔史記〕匈奴居於北蠻、隨畜牧而轉移、其畜之所
多則馬牛羊、其奇畜則橐駝、騊駼、騊駼、騊駼

嚴須呵八神

〔揚雄賦〕八神奔而警蹕、分振股鞞
而軍裝〔注〕自招搖至橘狂、凡八神

喜欲抃

百獸

〔書〕百
獸率舞

祖宗所繼承、宇宙徧包覆、上公敬執籙、天子親獻酎、靈光旂旗林

〔前漢郊祀志〕武宣之世、奉此
三神、禮敬教備、神光尤著、〔楚

辭〕孔蓋兮翠旂、
〔注〕旂一作旌

緝典禮樂囿、威儀一以整、瓊碎無不究、時惟正垂拱、國幸息戰鬪、玉策恐人聞

〔風俗通〕岱
宗上有金籙玉

策、能知人年壽修短、武帝探

得十八、倒讀曰八十後果然

帛書疑鬼授

〔紀事本末〕寇準自澶淵還、頗矜其功、王欽若深嫉之、進曰、澶淵之舉、以萬乘之貴、而
爲城下之盟、何恥如之、因勸帝惟封禪可以鎮服四海、誇示外國、然自古封禪、當得天瑞

天瑞安可必得、前代有以人力爲之者、大中祥符元年正月、皇城司奏有黃帛曳左承天門南鵠尾上、令中使視

紛紜務欺阿

〔又〕
欽若

之計、既行、陳堯叟、陳彭年、丁謂、杜鎬、
益以經義附和、而天下爭言祥瑞矣

制作窮刻鏤、老幼咸駿奔、穹丕摠歆臭

〔詩〕其香始升、上
帝居歆、胡臭亶時

中誠迺根本、外貌

特膚腠、封寧重穢繩

〔徐陵賦〕惟封云與禪肅、遺玉牒與金繩、〔封禪儀注〕持禮凡三十人、上發壇上十石礎蓋、尙書令北
向跪藏玉牒畢、持禮覆石函、尙書令封上十石檢、亦纏以金繩、泥雜用四方土、各依其色、礮音感、石礎也

饗或貴型館

〔荀子〕剖刑而莫邪已、〔按〕刑、同型、凡鑄式以上
曰型、以木曰模、以金曰範、鑄音澗、〔說文〕飯氣蒸也

居安昧危機、致治啓亂竇、文華終耗財、武弱益招

寇雖然喧一朝孰得燕末胄五輅忽已沒


〔晉輿服志〕玉金象革木等路是爲五路並天子之法車玉路最尊建太常十有二旂九佾委地畫日月升龍以祀天金路建大旂九旒以會萬國之賓亦以賜

上公及王子母弟象路建大赤通赤無畫視朝亦所以賜諸侯革路建大白以即戎兵亦以賜四鎮諸侯木路建大麾以田獵其麾色黑亦以賜藩國路與輅通

三京杏難救三京解見說宣和內宴

惜其初討論盍不

返朴陋臨風披此圖歎息我日綬



淵穎集卷二

樓光遠出示先賢圖像及漢季石本雜碑

世人不好古。我獨思古先。居然圖像間。得見古聖賢。遠之或千載。近亦數百年。精神果何在。面貌猶爾妍。凡民一其生。覆幬乃同天。紛紛日就滅。委棄隨烏鳶。烏鳶解見讀列子矧茲丹青筆。巧類造化甄。惟心卻不死。匪繪

尙能傳。豈伊祝畏壘。

〔莊子〕庚桑楚北居畏壘之山。其臣之畫然智者去之。其妾之挈然仁者遠之。臃腫之與居。鞅掌之爲使。居三年。畏壘大穰。畏壘之民相與言曰。庚桑子之來。吾洒然異之。令吾日計之而不足。歲計之而有餘。庶幾其聖

人乎。子胡不相與尸而祝之。社而稷之乎。

仍似畫凌烟。

〔唐書〕太宗貞觀十七年。畫功臣長孫無忌等二十四人像于凌煙閣。

衣冠從代改。俎豆與周旋。前人後所哀。後者復

爲前。展轉哀未盡。蒼茫但長川。我今以後古。古碣空餘鐫。水石久欲泐。蛟蚪起相纏。當風遽墮淚。詎減峴

山巔。

〔晉羊祜傳〕祜守襄陽。與鄧湛等登峴山。慨然嘆息曰。自有宇宙。便有此山。賢達勝士。登此者多矣。皆湮滅無聞。使人悲傷。漢曰。公德冠四海。道嗣前哲。必與此山俱傳。若湛輩。乃當如公言耳。祜卒。百姓爲建碑立廟。望其碑者。莫不流涕。名墮淚碑。

庶

以名德在。終爲日星懸。

夜聽李仲宏說廣州石門貪泉

〔晉書〕廣州包山帶海。珍異所出。一篋之寶。可資數世。然多瘴疫。人情憚焉。唯貧窶不能自立者。求補長史。故前後刺史。皆多贖貨。及吳隱之爲廣州刺史。既至。語其親人曰。不

見可欲使心不亂。越崖喪親。吾知之矣。乃至石門泉。酌而飲之。賦詩曰。古人云此水。一飲懷千金。試使夷齊飲。終當不易心。在州清操愈厲。常食不過菜及乾魚而已。〔名勝志〕石門山在番禺縣城西北二十里。兩山對峙如門。據南北往來之衝。上有西華寺。今廢。其西。食泉出焉。一名石門水。俗傳登大庾嶺。則清穢之氣分。飲石門水。則潔白之質變。〔按〕志縣屬廣東廣州府。

大粵控南海。茫然天地陬。〔前漢高帝紀〕吳芮從百粵之兵。以佐諸侯。〔按〕志。今廣東廣西俱古百粵地。南海解見新得南海志。石門屹有限。巖瀑蓄為湫。何哉清潔。

名坐與貪濁倅。使軺一杯飲。蠻賄卽繭抽。〔通鑑〕趙簡子使尹鐸為晉陽。請曰。以為繭絲乎。抑為保障乎。簡子曰。保障哉。〔注〕繭絲謂浚民之膏澤。如抽繭之緒。不盡不止。金珠混寶。

蛤。孔翠爛相繆。〔潛夫論〕和氏之璧。出於璞石。隋侯之珠。生於蜃蛤。〔楚辭〕孔蓋兮翠旂。〔注〕孔蓋以孔雀尾為車蓋。翠旂以翡翠羽為旌旗。烏文映吐陀。器物窮雕鏤。劇髻蛟龍。

悚。劇同披髻音奇。〔說文〕馬鬣也。織毳虎豹愁。〔周禮〕司服四望山川則毳。服毳音去。聲獸毛褥細者。島嶼刮欲竭。民夷起爭仇。聖王不忘遠。奸暴合汝郵。

靈若尙膏貨。〔潘岳賦〕靈若翔於神島。〔注〕海神也。惡風無時休。曉波半柘杓。渴沫萬戟矛。氣機乃日變。培克非人謀。〔詩〕曾

私疑勢至極。實爾釁所由。妖巫挾左道。峒獠稱豪酋。支祁妄解鑰。〔國史補〕楚州有漁人。忽於淮中釣得巨鐵鎖。挽之不絕。以告官。刺史李陽水大集人力引之。鎖

窮。有青獼猴躍出水。復沒而逝。後有嶮山海經云。水獸好為害。禹鎮之軍山之下。其名曰無支祁。〔岳瀆經〕禹治水。獲無支祁。形如獼猴。力踰九象。命庚辰制之。鎖於龜山之足。淮水乃安。蝦蟇怒翻舟。〔爾雅翼〕蝦蟇似蜥。蜴在屋壁間。狀雖似龍。

人所玩習。故淮南云。禹南濟於江。黃龍負舟。禹視龍猶蝦蟇。言不足畏也。蝦音煙。上聲。蟇音田。上聲。蕭遵竄黔南。沂三峽。次秭歸。黃神佑助。每涉險難。恍然如在。〔按〕志。入鮮或併命。吏商豈良籌。〔名勝志〕歸州城西三里。有叱灘。舊經云。水石相激。如噴叱之聲。一名人鮮。其上有黃龍廟。唐右史

蕭遵竄黔南。沂三峽。次秭歸。黃神佑助。每涉險難。恍然如在。〔按〕志。入鮮或併命。吏商豈良籌。〔名勝志〕歸州城西三里。有叱灘。舊經云。水石相激。如噴叱之聲。一名人鮮。其上有黃龍廟。唐右史

瘵。洗除崐崙窟。疏淪渤澥流。〔山海經〕崐崙山。河水出焉。〔物理論〕河色黃赤。衆川之流。蓋濁之也。百里一小曲。千里一大曲。一直一曲。凡九曲。以達於海。一塵了不動。六合嚴如秋。

嗟吾此身小。幸獨爲國憂。從茲斥聚斂。矧彼畜羊牛。馬援空薏苡。〔後漢書〕馬援在交趾。常餌薏苡實。用能輕身。省愆。以勝瘴氣。軍還載之一車。及卒後。有上書譴

之者。以爲前所載皆明珠文犀。王陽但衣裘。〔前漢王吉傳〕自吉至孫崇。世名清廉。然材器名稱。稍不能及父。而祿位彌隆。皆好車馬衣服。其自奉養極爲鮮明。而亡金銀錦繡之物。及遷徙去處。所載不過囊衣。不畜積餘財。天下服其廉。而怪其奢。

故俗傳王陽能作黃金。吉字子陽。百世不易操。嗚呼我賢侯。

秋日雜詩六首和黃明遠

京露幾時白。朔風吹雁寒。游俠豈不樂。山林已推殘。晶瑩龍尾劍。錯落虎皮冠。〔李白詩〕幽州胡馬客。綠眼虎皮冠。寄謝五

陵子。〔前漢原涉傳〕郡國諸豪。及長安五陵。諸爲氣節者。皆歸慕之。〔注〕五陵。謂長陵。安陵。陽陵。茂陵。平陵也。班固西都賦曰。南望杜霸。北眺五陵。是知霸陵。杜陵。非此五陵之數也。〔西都賦注〕高惠景武昭帝五陵。士人多宅於此。文帝杜陵。宣帝霸陵。在南餘

在北故曰五陵〔何妥詩〕
五陵多任俠輕騎自連羣

焉知行路難

〔按〕古樂府行路難注備言世路艱難及離別悲傷之意

二

明月出東山流光射牕牖美人曼聲歌翠袖拂南斗

〔別子〕韓娥曼聲長歌一里老幼喜躍忡舞

別離終不常歡樂詎能久笑折青

桂枝涼風吹我手

〔李白詩〕何以折相贈白花青桂枝

三

黃塵滿天地滄海悲鶻沒從來學仙人不在豪俠窟

〔杜甫詩〕慘淡豪俠窟〔注〕秦克六國輒徙其豪俠於蜀家有鹽銅之利人擅山川之材簫鼓歌吹擊鐘懸磬富侔公室豪過田文

豹鳥既飄飄

〔拾遺記〕穆王起青霄宮王母納丹豹交履

蜺旌何翕忽

〔宋玉賦〕蜺爲旌翠爲蓋

因之把酒杯坐嘯青山月

四

西風披白蘋

蘋一作蘋

楚客自枯槁

〔九歌〕登白蘋兮聘望〔注〕蘋音煩一作蘋非是蘋草秋生似莎而大

扳龍思上天勳業苦不早

〔後漢書〕耿純說光武曰士大夫從大

王於矢石之間者其計固望攀龍鱗附鳳翼以成其所志耳

遐心隨落鴻短髮等衰草亦有夫容花

〔班馬字類〕漢書司馬相如傳外發夫容與芙蓉同史記作芙蓉

嫣然爲誰好

五

寂歷林下扉。莓苔日應積。少年非隱淪。南陌事行役。書劍稍猖狂。衣冠多烜赫。何用擊樹枝。空山歌白石。

〔琴操〕寧戚飯牛車下。扣角而商歌曰。南山矸。白石爛。生不逢堯與舜禪。短布單衣。裁至舒長夜漫漫。何時且。桓公聞之曰。異哉歌者。非常人也。命後車載之。

六

代有遠游子。出門獨徘徊。自託羽林籍。〔前漢百官表〕羽林掌送從。次期門。武帝太初元年。初置。名曰建章營騎。後更名羽林騎。又取從軍死事之子孫養羽林。官教以五兵。號曰羽林孤兒。誰傾鸚

鵝杯。梁簡文書。車渠屢酌。鸚武驟傾。〔杜甫詩〕醉客沾鸚鵡。〔注〕鸚鵡螺也。塵生走馬埒。〔庾信馬射賦〕并試長楸之埒。〔又〕馬似浮雲向埒。埒音劣。〔說文〕埒垣也。草上呼鷹臺。〔元史〕至大元年。築呼

鷹臺於湖州澤中。發軍千五百人助其役。極目渺滄海。聊紓千里懷。〔宋玉招魂〕目極千里兮傷春心。

貞女引記予所聞於蘭溪錢彥明者

北方有達者。官守託閩壩。壩。解見效方。子清儂言。一笑侍盃櫛。〔左傳〕懷嬴奉匱盥盥。〔又〕懷嬴謂公子圍曰。寡君使婢子侍執巾櫛以固子也。千金得嬋娟。〔離騷〕女嬋嬋娟。

說文。態也。〔李白詞〕美人一笑千黃金。晨歌雲母幌。〔拾遺記〕晉惠起居注有雲母幌。夜舞荔枝筵。春桃獨不艷。秋柳遽無年。於焉榛筭毀。〔土冠禮〕設筭〔注〕

凡諸侯笄有二。一是紒內安髮之笄。一是皮笄。蔽弁及六冕固冠之笄。或用棒。〔三禮圖〕笄士以骨。大夫以象。〔說文〕簪也。〔按〕笄男女皆有之。不專屬女也。

遂以檟櫬遷。〔左傳〕初穆姜使擇美櫬以自爲櫬。

音容詎可

睹涕泣空餘漣。墓埏但未殉。床第更誰妍。

〔左傳〕牀第之言不踰闕。〔禮〕設牀禮第第音子。

越鸞悲掩鏡。

解見張節婦卷。

齊雉痛鳴弦。

〔揚雄琴清英〕雉

朝飛操者。衛女傅母之所作也。衛女嫁于齊太子。中道聞太子死。問傅母曰。何如。傅母曰。且往當喪。喪畢。不肯歸。終之以死。傅母悔之。取女所自操琴。于塚上鼓之。忽二雉俱出。墓中傅母撫雉曰。女果爲雉也。言未畢。俱飛而起。忽然不見。傅母悲痛。援琴作操。故曰雉朝飛。

人子當盡道。妾生敢移天。手澤尙不忍。

〔記〕父沒而不能讀。父之書。手澤存焉耳。

家風豈其愆。

解見宣和內宴雜事。

吾何惜吾軀。汝懼辱爾

先。郡庭給過所。江驛遞歸船。郵兵卽前防。纜卒復後牽。時時數釵珥。處處閱橐籥。心堅務玉白。鼻截愧瓦

全。〔列女傳〕吳孫奇妻者。廣陵范慎女。名姬。年十八配奇。一年而亡。慎以姬少寡無子。迎還其家。姬不肯歸。父迫之。姬遂操刀割耳及鼻。曰。父趣我者。不過以我年少而色美。今已殘矣。行將焉如。迎者乃返。

指波著重誓。抗節脫饑

涎。世故日已下。民瘼孰能然。狹邪情比絮。

〔蘇軾集〕東坡在徐州。參寥自錢塘訪之。坡席上令一妓求詩。參口占云。多謝尊前窈窕娘。好將幽夢惱襄王。禪心已作沾泥絮。不逐春風上下狂。

桑濮

步安蓮。

桑濮。解見張節婦卷。〔南史〕東昏侯鑿金蓮花貼地。令潘妃行其上。曰。此步步生蓮花也。

闕氏弄琵琶。青塚俗曷鐫。

〔西京雜記〕元帝後宮既多。使畫工圖形。按圖召幸。宮人皆賂畫工。獨王嬪不肯。遂不

得見。匈奴入朝。求美人爲闕氏。於是上案圖。以昭君行。及去。召見。貌爲後宮第一。帝悔之。而名籍已定。帝重信於外國。不復更人。乃窮案其事。畫工杜陵。毛延壽等。並棄市。〔石崇昭君詞序〕昔公主嫁烏孫。令琵琶馬上作樂。以慰其道路之思。其送明君。亦必爾也。其造新

曲多哀怨之聲。〔歸州圖經〕胡地多白草。昭君塚獨青。〔一統志〕昭君墓在古豐州西六十里。〔史記索隱〕閼氏匈奴皇后號也。晉煙支。

尼居感業寺。高宗於寺見之。復召入宮。拜昭儀。〔漢官儀〕皇后稱椒房。取其實蔓延盈升。以椒塗室。取溫暖除惡。

死間便見粲與淵。〔通鑑〕宋中書監袁粲謀誅蕭道成不克而死。道成進爵爲王。司徒褚淵奉璽詣齊宮勸進百姓謠曰。可憐石頭城。寧爲袁粲死。不作褚淵生。

而作。聚廳。呵嗟此貞女。儻或繼史編。似刺。

送宣彥昭北赴京師

去年春風來。我已送子兄。今年春風來。我復送子行。大江多波浪。雨雪塞路程。老河貫梁楚。〔按〕禹貢導河歷雍、豫、冀、兗。

四州之境而入海。〔一統志〕東魏梁州。今開封府。〔史記〕注。江陵爲南楚。吳爲東楚。彭城爲西楚。詳見嚴陵應仲章。汴泗割濁清。〔一統志〕汴水源出開封府滎陽縣。至中牟北入河。〔禹貢注〕徐之水有泗。有汶。有汴。有鄗。〔水經注〕泗水源

出魯卞縣故城。東南桃墟西北。梁山匯爲灤。〔高適詩〕雲開汶水孤帆遠。路過梁山四馬遲。〔按〕志。梁山在

〔禹貢〕覃懷底績。至于衡漳。〔注〕水名。〔一統志〕漳河其源有二。一出山西潞州長子縣。名濁漳。一出平定州樂平縣。名清漳。二源俱入彰德府境。合流人衛河。葭菼莽縱橫。飲饌去鄉異。市逢寒食餽。

寒食餞解見
嚴陵應仲章
游從到處闊騎聽上林鶯帝都示四方賓客聚百城白獸耀戟戩
〔三輔黃圖〕未央宮有白虎殿唐避太祖諱改爲獸〔杜甫詩〕寂寞

白獸闔〔注〕白獸闔即白獸門〔西京賦〕植綴懸戲殿晉伐盾別名紅鸞擁旗旌乍見須壁馬
〔前漢書〕武帝遣使者安車蒲輪束帛加璧召魯申公再談遽公卿
〔又〕吳公薦賈誼帝召以爲博士

時年二十餘一歲中超遷至大中大夫帝議以任公卿之位大臣多短之以爲長沙王太傅再召入見夜半前席曰吾久不見賈生自以爲過之今不及也以爲梁王太傅終然鳳鷁集恥作鰕蟹并況子昔我學

自期可俊英平時撫硯匣盡夜對燈檠古今更成敗舉舌卽深評北南幾水陸肆意勿遐征子兄特精幹

胷次有甲兵〔續長編〕陝西經略安撫副使范仲淹兼知延州先是詔分邊兵部署領萬人鈐轄領五千人都監三千人有寇則官卑者先出仲淹曰不量賊衆寡而出戰以官爲先後取敗之道也爲分州兵爲六將將三千人分部教之量賊衆寡使更

出禦賊賊不敢犯既而諸路皆取法焉賊相戒曰無以延州爲意今小范老子胸中自有數萬甲兵不比大范老子可欺也大范蓋指雍云被服抗俠窟
〔西京雜記〕王氏解見秋躋攀接侯鯖
五侯不相能賓客不

得來往妻護傳食五侯間盡得其歡心競致奇膳笑披鷹鷂論條鋤手所擊
〔野客叢書〕雜說謂鷹鷂之鷂史傳不載其名起於近世僕讀唐張子壽集鷹鷂圖贊序正有是論曰

鷹也名揚於尙父義見於詩鷂也迹隱於古人史闕其載豈昔之多識物亦有遺將今而嘉生材無不出爲所呼之變與所記不同者邪僕謂子壽亦未深考張衡東京賦鷂鷂春鳴北史文宣謂思好日爾擊賊如鷂入鴉羣左傳鷂鳩氏司事也枚乘賦揚雄方言爾雅說文俱有此字豈可謂迹隱

於古人史闕其載邪錯金琵琶槽絃索發奇聲二難苟若此何地不鏗轟
〔世說〕陳元方子羣與季方子忠各論其父功德爭之不能決咨於其祖太丘太丘曰

元方難爲兄。
季方難爲弟。

貢生彈冠待。

〔前漢書〕王陽與貢禹爲友。陽爲益州刺史。禹聞之。彈冠以待陽。薦陽薦禹於成帝。召爲大夫。

王粲倒屣迎。

〔魏志〕王粲字仲宣。蔡邕見而奇之。時邕才學顯著。貴重朝廷。當車騎。

填巷賓客盈。坐聞樂在門。倒屣迎之。樂至。幼弱短小。一坐盡驚。曰。此王公孫。有異才。吾不如也。吾家書籍文章。當盡與之。

上書令自銜。趣召使衆驚。尙期施展間。歸作閭巷榮。嗟吾

久抱疾。望子但目瞳。

〔莊子〕顏淵曰。夫子步亦步。趨亦趨。夫子奔軼絕塵。而回踵若乎。後矣。瞳音撐。張目視貌。

因之念吾兒。遲子謁國覺。吾兒早失學。所至類

孩嬰。幸令得好友。庶免謚愚氓。前園川海棠。紫蔓亂垂瓔。起揮雙玉壺。暢此孤劍情。當知子願欲。本不慕

肥輕。行哉自此遠。谷口吾躬耕。

〔逸士傳〕鄭朴。字子真。襄中人。隱於谷口。

諸暨北郭潘節婦卷後題

天地昔立極。聖人本有防。辟之制洪水。瀦蓄以爲常。不然遽汜溢。隨處恣披猖。終將大節撓。寢我爨倫傷。南州彼何人。北郭得新孀。盛年喪所天。臨鏡毀舊粧。春秋奉饋祀。暇乃治蠶桑。豈惟育稚幼。抑且禮尊璋。尊璋日已老。稚幼儼成行。託孤生當盡。從一死則臧。

從一解見張節婦卷。

乘時或棄背。妮嫁更衣裳。疇悲膏沐容。

〔詩〕豈無

膏沐誰適爲容。

畢命松柏崗。世人如輕塵。風至卽飄揚。我身類完玉。火烈愈耀光。自來菅蒯姿。曾不異姬姜。

〔左傳〕雖有絲

麻不棄菅蒯。雖有
姬姜。毋棄憔悴。

毋寧窈窕化。

〔詩〕窈窕淑
女。君子好逑。

孝敬著一鄉。一鄉尚謂狹。千載顧不長。吾其撫野草。可但感嚴霜。

起操膝間瑟。彈作雙鳳凰。鳳凰不再下。寒月照屋梁。

〔類函〕琴歷曰。琴曲有雙鳳。離鸞等調。
〔杜甫詩〕落月滿屋梁。猶疑照顏色。

同方子清觀管子內業

之人東隣居。爲發架上篋。吁嗟管夷吾。遺我以內業。古書本少見。古道終不貽。遺文久灰燼。瑣語特枝葉。

禮。天下無道。
則辭有枝葉。

爲儒每更端。

〔又〕君子問
更端則起而對。

務學多涉獵。

〔吳志〕孫權謂呂蒙曰。卿今當塗掌事。不可不學。蒙辭以軍中多務。
權曰。孤豈欲卿治經爲博士邪。但當涉獵見往事耳。〔注〕涉獵。言泛

濫流觀。譬如涉水
獵獸不精專也。

遠馳盍求心。近眩將失睫。紛綸諸子間。變亂聖王法。百家各爲主。一理能足攝。彼哉所施

教。何得不我協。士鄉自宜然。伯政吾甚捷。

〔國語〕管子制國以爲二十一鄉。工商之鄉六。士
鄉十五。公帥五鄉。焉國子帥五鄉。焉高子帥五鄉。焉。

當其解而囚。豈謂射

中協。

〔左傳〕師及齊師戰于乾時。我師敗績。鮑叔帥師來言曰。子糾親也。請君討之。管召仇也。請受而甘心焉。乃殺
子糾于生竇。召忽死之。管仲請囚鮑叔受之。及堂阜而稅之。〔國語〕桓公曰。管夷吾射寡人中鈞。是以濱于死。

利源魚鹽開。

〔史記〕設輕重魚鹽之利。〔管子〕
公問管子何以爲國。曰。惟山海可爾。

兵武劍戟接。

〔國語〕管子作內政而寄軍令。五家爲軌。故五人爲伍。軌長帥之。十軌爲里。
故五十人爲小戎。里有司帥之。四里爲連。故二百人爲卒。連長帥之。十連爲鄉。

故二千人爲旅。鄉良人帥之。五鄉一帥。故萬人爲一軍。五鄉之帥帥之夜戰聲相聞。足以不乖。畫戰目相視。足以相識。

私疑聃莊言。或混孔子孟牒。鬼神通幽奧。詩禮借光暉。操存

性情常。食飲精氣。決於焉覈天人。不獨滕齒頰。

〔內業篇〕凡物之精。此則爲生。下生五穀。上爲列星。流於天地之間。謂之鬼神。藏於胸中。謂之聖人。〔又〕思之思之。鬼神通之。非鬼神之力也。精氣

之極也。〔又〕凡人之生也。必以平正。所以失之。必以喜怒憂患。是故止怒莫若詩。去憂莫若樂。節樂莫若禮。守禮莫若敬。守敬莫若靜。內靜外敬。能反其性。性將大定。〔又〕凡食之道。大充傷而形不臧。大攝骨枯而血涸。充攝之間。此謂和成。精之所舍。而智之所生。饑飽之失度。乃爲之圖。〔又〕天主正。地主平。人主安靜。春秋冬夏。天之時也。山陵川谷。地之枝也。喜怒取予。人之謀也。是故聖人與時變而不化。從物而不移。〔易〕咸上六象曰。咸其輔頰舌。滕口說也。楊朱說力命。列子亦已雜。見

讀列子。管氏役權謀。聖門詎容躡。茫茫大江流。可望不可楫。朝來有微雲。卻倚青岌峩。

書宗忠簡公家傳及部曲記

宋史本傳。宗澤字汝霖。義烏人。

勢極崇必圯。天方獵元元。兵甲暴草野。大河爲塞垣。猗歟我宗公。往作汴北門。

汴解見說宣和內宴。〔宋史〕欽宗靖康元年。金人渡河陷西京。遂

圍京城。京城陷。帝如金營。請降。詔康王構爲天下兵馬大元帥。陳遘爲元帥。汪伯彥。宗澤爲副元帥。使盡起河北兵。速入衛。二年。二帝北狩。康王即位於南京。以宗澤爲東京留守。〔左傳〕杞子告于秦曰。鄭人使我掌其北門之管。

蕃戎斜曳戟。盜

賦望風奔。

〔本傳〕澤留守東京。時賊騎留屯河上。金鼓之聲相聞。而京城樓櫓盡廢。兵民雜居。盜賊縱橫。人情恟恟。澤既至。首捕誅舍賊者數人。下令曰。爲盜者。賊無重輕。悉從軍法。由是盜賊屏息。民賴以安。

老羆尙當道。力攫

氣欲吞四顧萬騎集。中嚴一旗尊。

〔又〕真定懷衛間。虜兵甚盛。澤以為憂。乃渡河。約諸將議圖收復。而於京城四壁。各置使。以領招集之兵。又據形勝。立堅壁二十四所。於城外。沿河鱗次為連珠砦。連結河東河北山。

水砦忠義民兵。於是陝西京東西諸路人馬。咸願聽澤節制。〔北史〕韓軌等襲華州。王罷大呼曰。老罷當遣臥。豹子那敢過敵退。

吳越僻且遐。梁宋仍屋完。誓迴龍頭幔。身屬豹尾韃。

〔宋史〕靖康二年五月。康王即位於南京。十月。帝如揚州。時兩河雖多陷於金。而民懷舊恩。皆用建炎年號。及聞帝南幸。無不解體。澤上疏言。願陛下從臣措畫。陳帥鞠旅。盡掃胡塵。奉迎變輿。早還京闕。〔前漢書〕梁孝王城睢陽。北界太山。西至高陽。四十餘城。多大縣。

〔唐書〕宋州睢陽郡。屬河南道。本梁郡。天寶元年更名。〔舊唐書〕宋州治宋城。即漢睢陽縣。〔按〕志。即今開封府。屋古文厚。〔說文〕幔幕也。〔石林燕語〕宋殿廡幕次。獨近世堂木加互以建帳。行時撤而載之。〔漢書注〕服虔曰。大駕八十一乘。最後一乘。懸豹尾。〔說文〕韃。解見李。

所以戢弓矢。周鼎沒未獲。魯戈揮轉昏。居巢有死憤。

〔淮南子〕魯陽公與韓戰。戰酣。日暮。拔戈而揮之。日為之反三舍。項羽漢用反間。羽疑增有私。增大怒。乞骸骨歸。未至彭城。疽發背死。年七十。〔按〕本傳。澤前後請上還京。二十餘奏。每為黃潛善。汪伯彥所抑。憂憤成疾。疽發於背。諸將入問疾。澤瞿然曰。吾以二帝蒙塵。積憤至此。汝等能殲敵。則我死無憾。衆皆流涕曰。敢不盡力。諸將出。澤嘆曰。出師未捷。身先死。長使英雄淚滿襟。無一語及家事。但連呼過河者三。而薨。年七十。諡忠簡。

駱谷無留屯。猶撐半天下。少掾千丈渾。

〔三國志〕蜀姜維出師駱谷。〔元和郡縣志〕儋谷一名駱谷。在興道縣北三十里。〔按〕志。今在陝西漢中府洋縣。〔蘇軾詩〕

南卻軒騫。宣初為澤。戲下統領官。張搗戰。滑州澤令宣授之。搗死宣。大捷。遂權滑州。猶撐半天下。少掾千丈渾。

〔皇朝忠義名氏圖〕澤救滑州。問諸將。張搗慨然請行。與虜大戰。死之。王

清不如尺水渾。雞鳴夜舞劍。邈矣逃與琨。於茲讀公傳。義士古所敦。

皂角林觀劉錡戰處

〔本傳〕高宗紹興三十一年金主亮調軍六十萬自將南來彌望數十里不斷如銀壁中外大震時宿將無在者乃以錡為江淮浙制置使節制逐路軍馬〔又〕金萬戶高景山攻揚州錡遣員琦拒於

皂角林陷圍力戰林中伏發大敗之斬景山俘數百人

東都何慘澹南土劇蕭騷

〔按〕宋史太祖元年以大梁為東京開封府高宗南渡即位於建康紹興八年定都臨安〔按〕志臨安今浙江杭州府

往往墮戰鬪於焉出英髦為

君竟如寄立國已不高家供敵人賂歲奉使客艘

〔又〕紹興十一年和議成歲幣銀絹各二十五萬自建炎以來奉使如金被拘囚者三十餘人惟行人洪皓張劭朱弁三人以和議成許歸

乾坤忽掀簸城郭皆動搖狡兔手可攫

〔國策〕馮煖謂孟嘗君曰狡兔有三窟僅得免其死耳

長蛇心更饜

〔左傳〕吳為封豕長蛇以薦食上國

精熒金鎖甲

翕施橘紅袍

〔續通鑑〕金主亮臨江築臺被金甲登臺殺黑馬以祭天以一羊一豕投於江中召諸將謂之曰舟楫已具可以濟矣

厲矛終抉腕投鞭遽填壕

〔本傳〕兀朮被白袍乘甲馬以牙兵三千督

戰兵皆重鎧甲號鐵浮圖戴鐵兜牟周匝綴長簷三人為伍貫以韋索每進一步即用拒馬擁之人進一步拒馬亦進退不可卻官軍以槍標去其兜牟大斧斷其臂碎其首〔晉書〕苻堅伐晉曰以吾之衆投鞭於江足以斷其流

云何大兵壓上

謂和好牢

〔續通鑑〕帝聞金主亮有南侵之意疑之使王綸往覘綸還入對言鄰國恭順和好無他

白波播天險

〔通鑑〕魏主丕伐吳臨江觀兵見波濤洶湧嘆曰固天所以限南北也乃還

清野捲地毛

〔博物志〕地以草為毛

將營皂林斫軍艦采石塵

〔續通鑑〕金主亮臨采石誓明日濟江時劉錡將王權軍潰於昭關退屯采石帝以李顯忠代將命虞允文往迎顯忠交權軍且犒師允文至采石權已去顯忠未來允文遂召

將勉以忠義諸將請死戰乃命諸將列大陣不動分戈船爲五其二並東西岸其一駐中流藏精兵待戰其二藏小港備不測部分甫畢敵已大呼亮操小紅旗麾數百船絕江而來瞬息之間抵南岸者七十艘直薄官軍軍小卻允文入陣中撫統制魏俊之背曰汝膽略聞四方立陣後則兒女子耳俊即揮雙刀出土殊死戰中流官軍以海艙船衝敵舟皆平沈敵半死半戰日暮未退會有潰卒自光州至允文授以金鼓從山後轉出敵疑援兵至始遁允文又命勁弩尾擊追射大敗之允文又知敵當復來夜半部分諸將明且敵果至復大敗之金主焚其龍鳳舟以遁

〔按〕志采石今江南太平府

〔本傳〕紹興三十二年閏二月

向非斯人在久矣淒煙蒿龍

虎空野競

〔玄覽賦〕鬪二虎於江干爭兩龍於修坂

狐狸遂寒嗥

〔左傳〕狐狸所居豺狼所號

信史猶未著奇功果誰褒因之懷舊跡一弔楚江

皐

喻東泉學道止酒自書止酒詩座右戲寄

何故欲止酒自吟止酒詞酒何負於人杯杓遽不持我雖不解飲見飲輒喜之何疑酒亂性屏去無醇醪乃言執道要危坐息犇馳行思駕羽輪久矣夢肉芝

〔抱朴子〕山中有小人乘車馬長七八寸者肉芝也服之即仙

髮再生一道

鳳鸞守爐鼎龍虎擅崛奇

解見讀參同契

狂醒不我毒

〔晉書〕孫季舒嘗與石崇飲傲慢過度崇欲奏之裴楷曰飲人狂藥責人正禮不亦乖乎崇乃止

痛飲非

吾師

〔世說〕王孝伯言使嘗得無事痛飲讀離騷便可稱名士

終然彼先酒昔者祀狄儀

〔世本〕儀狄始作酒醪變五味

笑揮金叵羅

〔李白詩〕蒲萄美酒金叵羅〔注〕金罍也

倒

著白接籬。〔世說〕山季倫爲荊州時出酣暢人爲之歌曰山公時一醉逕造華陽池日暮倒醉歸酩酊無所知時復乘驄馬倒著白接籬舉手語葛強何如并州兒籬或作籬 常人溺妄境世慮動焚絲。〔左傳〕

魯衆仲論衛州吁曰臣聞以德和民不聞以亂以亂猶治絲而棼之也。爭如醉酩酊得以混希夷。〔老子〕視之不見名曰夷聽之不聞名曰希 神仙矧多幻狡獪無不爲遨遊

市舍長調謔酒家姬唱歌便爛熳冠珮任傾欵吾知麻姑過。〔神仙傳〕王方平度括蒼民蔡經尸解十年經還家云七月七日王君來可作百斛酒以待其日果至 解

與陽都期。〔仙媛紀事〕有黑山仙人常乘轎來往陽都酒家女悅之遂爲夫婦 惕哉學仙侶身若槁木枝云胡千瓢量。〔孔叢子〕平原君與子高飲強

飲百瓢子路嗑嗑尙飲百榼古之賢聖無不能飲子何辭焉。政類斷乳兒歡伯卻恨訴。〔易林〕酒爲歡伯除憂來樂適體頤性 麴生亦嗟咨。〔開天傳信記〕葉法善有道術一日與朝士會忽一人扣門

稱麴生秀才突入坐內言語不凡葉疑其非人潛以飛劍擊之應手墮地乃一酒榼中有美醜飲之同坐曰麴生風味不可忘也。丹室尙恍惚醉鄉終棄遺。〔唐書〕王績作醉鄉記以次劉伶酒德頌〔舊唐書〕績字無功隋大

業中授六合縣丞棄官還鄉嘗躬耕於東臯號東臯子或經過酒肆動輒經日往往題壁作詩多爲好事者諷詠。萬一君上天酒星恐君疑。〔星經〕酒旗三星在軒轅右角南酒官之旗也主宴享飲食〔摭言〕衛元規酒後忤

丁僕射以書謝曰自茲因酒星於天獄焚醉石於秦坑。抑且君得封酒泉併須移。〔三秦記〕酒泉郡城下有金泉泉味如酒故名酒泉〔杜甫歌〕汝陽三斗始朝天道逢麴車口流涎恨不移封向酒泉〔拾遺記〕姚馥遷酒

泉太守詳見紫絲盛露囊歌〔九州春秋〕曹公禁酒孔融書嘲之曰天有酒旗之星地列酒泉之郡。竹溪清風裏。〔唐書〕李白孔巢父韓準裴政張叔明陶沔居徂徠山日沈飲號竹溪六逸 栗里落照時。〔廬山記〕陶

淵明所居栗里兩山間有大石仰視懸瀑可坐十人嘗醉眠其上名醉石。二子豈不飲千秋長若斯。

樓彥珍北游京師予病不及往餞歲晚有懷并寄彥昭浚常

日晚北風起少年方遠游徘徊上谷塞眺望黃河流。

上谷黃河解 見送鄭浚常

崢嶸十月冰朔色壓九州熒煌大明殿。

〔元史〕世祖十八年二月發侍衛軍四千完正殿二十一年正月帝御大明殿右丞相和禮霍孫率百官奉玉冊玉寶上尊號諸王百官朝賀如朔且儀〔輟耕錄〕帝居分十一門正南曰麗正大內南臨麗正門曰大明殿乃登極正且壽節會朝之正衙也 御道

接龍樓

〔輟耕錄〕元蒼鳳樓在青陽南三間高四十五尺驂龍樓在明暉南制度如蒼鳳〔前漢成帝紀〕帝為太子上嘗急召出龍樓門不敢絕馳道西至直城門得絕乃度還入作室門上遲之間其故以狀對上大悅乃令太子得絕馳道 時巡

向灣水

〔元史志〕至治三年都水監言河西務菜市灣水勢衝囘與倉相近將來為患宜於劉二總管營相對河東岸截河築隄改水道與舊河合〔方輿紀要〕張家灣在通州南十五里元萬戶張瑄督海運至此而名東南運艘由直沽河百十里至河西務又百三十里至張家灣入通州倉蓋蘆溝河與白河會流處也〔長安客話〕張家灣為潞河下流南北水陸要會自潞河南至長店四十里水勢環繞船舫並集最稱繁盛 臘雪擁薊丘 〔水經注〕薊州城內西北隅有薊丘因丘以名邑也猶

魯之曲阜 齊之營丘

前驅鸞鳳旗後乘貂鼠裘尚食豐宴飲

〔唐書百官志〕尚食局尚食二人掌供膳 產品齊總司膳司醢司藥司饌凡進食先嘗

教坊樂筚篥

〔雍錄〕開元二年

正月置教坊於蓬萊宮側自上教法曲謂之梨園弟子〔教坊記〕西京右教坊在光宅坊左教坊在延政坊東京兩教坊多在明義坊而右在南左在北也〔文獻通考〕筚篥唐制似瑟而小其絃有七用木撥彈之以合二變故燕樂有大筚篥小筚篥晉逐手起曲隨絃

成。蓋若鶴鳴之嘹唳。玉聲之清越者也。〔續文獻通考〕元筮篋制。以木闕腹。腹下施橫木而加軫。二十四柱。頭及首並加風喙。〔樂府雜錄〕筮篋乃鄭衛音之權輿也。以其亡國之音。故號空國之侯。亦曰坎侯。古樂府有公無渡河之曲。昔有白首翁溺於河。歌以哀之。妻麗玉善筮篋。撰此曲以寄哀情。〔風俗通〕筮篋一名坎侯。謹按武帝祀太山。太后。士令樂人侯調。依琴作坎。侯言其坎。坎應節也。侯以姓冠章也。或曰筮篋取其空中。

想爾觀覽周。卻疑書傳間。不謂秦漢優。何家非許史。
〔前漢蓋寬饒傳〕上無許史之屬。下無金張之託。〔注〕許伯宣。帝皇后父。史高。宣帝外家。金日磾。張安世。言許史氏有外戚。

之恩。金氏張氏自無客不枚鄒。
〔前漢書〕枚乘字叔。為吳王濞郎中。王謀為逆。乘諫不用。去遊梁。從孝王遊。景帝召拜為弘農都尉。乘久為大國上賓。與英俊並遊。得其所好。不樂居郡。以病去官。復游梁。梁客皆善屬詞賦。乘尤高。

孝王薨。乘歸淮陰。武帝自為太子。開乘名。及即位。乘年老。迺以安車蒲輪徵乘。道死。〔又〕鄒陽齊人也。吳王濞招致四方游士。陽與嚴忌。枚乘等俱仕吳。皆以文辯著名。上書諫吳王。不內去之。梁從孝王游。羊勝等惡之。孝王下陽吏。陽迺從獄中上書。孝王立出之。卒為上客。

投輪卽雨集。
〔又〕陳遵字孟公。為京兆吏。放縱不拘。每大飲。賓客輒閉門。取客車轄投井中。雖有急。終不能去。揮袂遽雲浮。
揮袂。解見。送俞子琦。東航扶桑陰。西笮崑崙陬。變

化指顧異。芻蕘立言收。
〔詩〕先民有言。詢于芻蕘。〔續齊諧記〕晉武帝問擊虞。三日曲水之義。答曰。漢章帝時。徐肇以三月初生三女。至三日俱亡。村以為怪。乃攜酒就水洗滌去災。帝曰。如此便

非佳節。尚書郎東皙對曰。虞小生。不足以知之。昔周公卜洛邑。因流水以泛酒。故逸詩云。羽觴隨波流。又秦昭王置酒河曲。有金人出。捧水心劍。曰。令君制有西夏。及秦霸諸侯。乃因此處立為曲水祠。二漢相緣。皆為盛集。帝善之。
土音吾越謳。
見解。

望會。私將竊祿志。勇赴隨陽謀。隨陽卽澤鴈。竊祿豈梁鷺。
〔書〕陽鳥攸居。〔注〕陽鳥。隨陽之鳥。謂鴈也。〔詩〕有鷺在梁。美玉獻劍璣。
〔前漢王莽傳〕莽

疾孔休候之莽緣恩意進其玉具寶劍欲以為好休不肯受莽因曰誠見君面有瘡美玉可以滅瘡欲獻其珠耳即解其珠休復辭讓莽曰君嫌其賈邪遂椎碎之自裹以進休休乃受〔注〕服虔曰珠音衛蘇林曰劍鼻也師古曰珠字本作齧從玉齧聲後轉寫者訛也珠自雕琢字精金鏤斧鞞〔史記〕淳于髡曰若親有嚴客髡鞞鞞鞞侍酒於前時賜餘瀝飲不過二斗徑醉矣〔注〕鞞音卷收衣袖也鞞臂捍也鞞曲也鞞同鞞

章謾老耄鄉里惟田疇功名幸一遇螻蛄尙公侯二語解見蜂房學問敢強飾黍稷待糶糴當令竹帛上直與先

達侔〔後漢鄧禹傳〕禹開光武安集河北即杖策北渡追及於鄴光武見之甚歡謂曰生遠來寧欲仕乎禹曰不願也但願明公德加於四海禹得效其尺寸垂功名於竹帛耳〔注〕古無紙有事或書竹簡或書縑帛故曰竹帛〔庾亮表〕十餘年間位超先達

毋使螢燭光肅然寸草秋〔杜甫螢火詩〕幸因腐草出敢近太陽飛〔莊子〕堯讓天下於許由曰日月出矣而燭火不息其於光也不亦難乎〔易通卦驗〕立秋腐草化為螢嗟予久抱疾餞酒

弗及蕩念爾忽萬里征夢或見求二語解見夢巖南老人宣生頗俊逸鄭子復綢繆趾高有捷步胷正無昏眸早看拜

家慶共許動宸旒傳車定不礙關鑰便若抽二語解見送鄭浚常杏花開如錦楊柳滿陌頭去時小兒女來詫真驂騑

驂騑解見詠小兒高馬圖

陳彥理有漢一字石經云是王魏公家故物予得其六紙蓋石文剝落者大半紙尾猶存蔡邕馬日

碑字

〔隸釋〕靈帝紀云。詔諸儒正五經文字。刻石立於太學。蔡邕傳則云。奏求正定六經。紀傳既已不同。陸機洛陽記所載。但有書易、公羊、禮記、論語、爾雅。隋志云。後漢刻七經於石碑。皆蔡邕所書。其目有一字石經、儀禮九卷。乃漢史陸記之疏略也。〔又〕水經云。光和六年。立石於太學。其上悉刻蔡邕名。魏正始中。又刻古篆隸三字石經。蓋諸儒受詔在熹平。而碑成則光和年也。隋志有一字石經七種。三字石經三種。其論云。漢鑄七經。皆蔡邕書。又云。魏立一字石經。其說自相矛盾。新舊唐志。有今字石經七種。而注論語云。蔡邕作。又有三字石經古篆兩種。蓋唐史以隸爲今字也。觀遺經字畫之妙。非蔡中郎輩不能爲。以黃初後來碑刻比之。相去不啻霄壤。豈魏人筆力可到。當以水經爲據。三體者。乃魏人所刻。儒林傳云。爲古文篆隸二體者非也。史稱邕自書丹。使工鐫刻。今所存諸經字體。各不同。雖邕能分善隸。兼備衆體。但文字之多。恐非一人可辦。史云。邕與堂谿典、楊賜、馬日碑、張訓、韓說、單颺等。正定諸經。今公羊論語之後。惟堂谿、日碑二人姓名尙存。別有趙陔、劉弘、張文、蘇陵、傅楨、左立、孫表數人。竊意其間必有同時揮毫者。予詳玩遺字。公羊、詩、書、儀禮。又在論語上。劉寬碑陰。王暉題名。則公羊詩書之厲行也。黃初孔廟碑。則論語之苗裔也。識者當能別之。

先聖去已久。世傳惟六籍。後儒各專門。穿鑿多變易。蔡邕在季漢。章句攻指擿。八分自爲書。刊定乃勒石。

〔後漢書〕蔡邕以俗儒穿鑿經籍。疑誤後學。與堂谿典、馬日碑等。奏求正定六經文字。時博士試甲乙科。爭第高下。至有行賂改蘭臺漆書經字。靈帝乃從諸儒之請。刊石立之太學。天下咸取則焉。碑高一丈廣四尺。〔按〕八分書者。漢章帝時。王次仲所作。蓋割程邈隸書之八分。而取其二。割李斯小篆二分。而取其八也。

四十六。兵火空餘迹。

〔書籍考〕董卓遷都。典策剖散。緜帛圖書。大者連爲帷。小者制爲囊。〔洛陽記〕碑凡四十六。書易、公羊、二十八碑。其十二毀。論語三碑。其二毀。禮記十五碑。皆毀。

熹平歷正始。洛土

重求索。

解見上。

衛侯師邯鄲三體精筆畫煌然立其西學者常嘖嘖。

〔墨池編〕魏初博士清河張緝著埤倉廣雅古今字詁陳留邯鄲洹亦與緝同時博聞古藝特善倉雅。

有名於緝以書教諸皇子又建三字石經於漢碑之西其文蔚炳三體復宣校之說文篆隸大同而古字少異〔又〕漢武時魯恭王壞孔子宅得古文尙書春秋論語孝經時人已不復知古文謂之蝌蚪書漢世祕藏希得見魏初傳古文者出於邯鄲淳衛敬侯爲寫尙書

後以示淳而淳不別至正始中立三字石經轉失淳法。

史書竟差舛一字幾不覲。

解見題注。

北都如遷鼎。

遷鼎解見李鐵槍本末。

西國類藏壁。

藏壁解見送鄭獻可。

砥柱

或淪亡。

〔書籍考注〕初隋嘉則殿書三十七萬卷至武德初有書八萬卷王世充平得舊書八千餘卷遣宋遵貴監運東都浮舟沂河西至京師于餘卷遣宋遵貴監運至砥柱舟覆盡亡其書

隋宮猶作碣。

〔隸釋〕石經殘碑北齊

徙之鄴都至河陽岸頽半沒於水隋復載入長安有易一卷書六卷魯詩六卷儀禮九卷春秋一卷公羊九卷論語一卷未及補治而亂作營繕者至用爲柱礎礪音昔〔廣韻〕柱下石

於茲特隸科早已等瓦礫寧知

一字遺不與中郎隔。

按蔡邕初年拜平元左中郎將。

唐人試書學小學發光隤。

〔通鑑〕唐取士以身言書判〔注〕體貌豐偉言詞辨正楷法逾美文理優長四事皆可取則先德行

魏公

蓄紙本六紙忍捐釋模糊千莓苔糾結萬蜥蜴聖文空往燼聖髓尙餘瀝粵從秦以來儒術經五厄。

〔按〕書籍

考在秦則厄於始皇之焚燒在漢則厄於莽卓之兵燹三厄於蕭梁四厄於砥柱至唐祿山之亂而寸牘不遺

到今厄者幾日月愈輝赫甚哉石爲經爭似經在壁此石不獨

存吾心竟誰惕。

望會稽山

解見雲門紀行

自我行至越。因之成越吟。

〔史記〕越人莊舄仕楚執珪。有頃而病。楚王曰。舄故越之鄙細人也。今仕楚執珪。貴富矣。亦思越否。中謝對曰。凡人之思故在其病也。彼思越則越聲。不思越則楚聲。使人聽之。猶尚越聲也。

會

稽乃巨鎮。雄拔天東南。東南誰開闢。大禹世所欽。外夷島嶼接。

〔輿地志〕日本國東海島夷地。在浙江東海中。其朝貢由寧波入。

支子祧廟臨

〔史記〕夏少康封子無餘於會稽。奉禹祀。

磬鞞或聲諫。

〔通鑑〕禹以五音聽治。爲銘於巽簾曰。導以道者擊鼓。諭以義者擊鐘。告以事者振鐸。啓以愛者擊磬。有獄訟者搖鞞。

標橈惟力任。

〔按〕書注。泥乘標橈。解見射的山。

輶山乘標。史記輶作橈。漢書作靄。以板爲之。其狀如箕。摘行泥上。標或作橈。史記作橋。

收功黃熊化。

〔左傳〕子產曰。昔堯殛鯀。其神化爲黃熊。以入於羽淵。實爲

漢書作橈。以鐵爲之。其形似錐。長半寸。施之屐下。以上山不蹉跌也。標音雷。橈音蹠。

夏郊三

畫道應龍深。

〔名勝志〕會稽山之東。有禹窆石。窆石之左。即禹廟也。梁末。修廟得一木。取以爲梁。乃鄞縣大梅山頂梅木。張僧繇畫龍於上。忽夜風雨。飛入鏡湖。與龍鬪。後人見梁上水草淋漓。始駭之。乃以鐵索鎖於柱。〔廣雅〕有

翼曰

衣冠千年窆。

解見射的山。

玉帛萬國沈。

〔通鑑〕禹會諸侯於塗山。執玉帛者萬國。

荒烟專車骨。

〔國語〕吳伐越。墮會稽。獲骨焉。節專車。吳子使問仲尼。仲尼曰。昔禹致羣臣於會稽之

山。防風後至。禹戮之。其骨專車。

落日望狩心。盛德蔑以過。遺祠尙茲歆。渤澥斂餘漲。蒼梧分遠陰。

〔宋之問禹廟詩〕玉帛空天下。衣冠冠海隅。旋開壓黃屋。便道出

蒼梧。林表祠轉茂。山阿井詎枯。按舜南巡。崩於蒼梧。禹南巡。崩於會稽。故以蒼梧爲言。

前迎蓮花渚。後擁竹箛林。

解見雲門紀行。〔爾雅〕東南之美。有會稽竹箛。

猶迴剡曲棹。

〔語林〕王子猷居山陰。

大雪夜開室命酌四望皎然因咏招隱忽憶戴安道時在剡乘興棹舟經宿方至既造門而返或問之曰乘興而來興盡而返何必見安道邪

肯鼓王門琴

〔晉中興書〕戴逵字安道少有文藝善鼓琴太宰武陵王晞聞其能琴使人召焉逵對使者

前破琴曰戴安道不為王門伶人

秦皇舊時輦散亂何可尋

解見雲門紀行

欲去不忍去追遊更來今

次定海候濤山

按志定海縣屬浙江寧波府古鄞縣地金人渡浙宋高宗乘樓船泊此候濤山在定海四向海天無際與巾子山形勢相拱朝鮮日本諸國皆在指顧之中諸蕃入貢停舶於此故又名招寶山

悲歌忽無奈天海何渺茫放舟桃花渡回首不可量

〔名勝志〕江之桃花渡北天成阜阜九十有九獨有一阜半入於江其曰北渡者即奉化之北界也按奉化縣志桃花坑山在四明山

南壁立數仞延袤千尺石色紅白相間狀若桃花初發故名四山環繞如盤谷中有平田百畝

南條山斷脉北界水畫疆居然清冷淵枕彼黃茅岡朝滲日星黑夜

凄金碧光蹲虎岩倚伏

〔定海縣志〕虎蹲山屹立海口出此則為大洋與蛟門山俱為天設之險

鬪雞石乖張

〔慈谿縣志〕大蓬山一名遠蓬山上有岩高五六丈左右二山屹立如鬪雞名鬪雞石

鷲越湛盧

〔吳越春秋〕越王允常聘區冶子作名劍五枚一曰純鈎二曰湛盧三曰豪曹或曰盤郢四曰魚腸五曰巨闕

盪泊吳餘皇

〔左傳〕吳伐楚戰于長岸子魚先楚師繼之吳大敗吳獲其乘舟餘皇以歸〔注〕餘皇舟名

幽波視若畝巨壑深扶桑

扶桑解見早秋偶然作

招徠或外域貿易叢茲鄉

按先生集中甬東記云自慶元桃花渡覓舟而東海際山童無草木或小僅如筋輒刈以鬻鹽東偏海有招寶

山東夷以海貨來互市必舶此山

嗚啞燕國語

〔墟遺〕唐王榭居金陵以航海為業遇風舟破榭附一板抵一洲見翁媪皆皂服曰此吾主人郎也引至宮室見王坐大殿王皂袍烏冠金花閃閃以女妻榭榭問女曰此國何名曰烏衣國也王召

宴命作詩。有恨不此。身生羽翼之句。王不悅。命取飛雲軒遣歸之。令樹入其中。閉目少息。已至其家。梁上雙燕。呢喃下視。樹乃悟。所止燕子國也。

慎倒龍衣裳

〔書〕烏夷卉服。厥篚織貝。注。卉。草也。葛越木棉之屬。織貝。錦名。織為貝文。詩曰。貝錦是

也。按甬東記云。昌國本禹貢島夷後。〔謝翽集〕

方物抽所寶

〔書〕明王慎德。四夷咸賓。無有遠邇。畢獻方物。惟服食器用。

水犀警非常

〔蜀王本紀〕江水為青。李冰作石犀五

羽管。乘舟至鄞。望海上島無數。民多卉服。

枚。二在府中。一在市橋下。二在水中。以厭水精。〔晉書〕溫嶠過牛渚磯。深不可測。遂燃犀角而照之。須臾。見水族奇形異狀。或乘車馬。著赤衣者。嶠至夜夢人謂己曰。與君自別。何意相照。意甚惡之。未幾卒。〔北戶錄〕堪辨毒藥酒。或中毒箭。刺於瘡中。立愈。蓋犀食百毒

故也。刺棘。驅鱗作旗幟。〔爾雅翼〕海鱗長者數千里。穴居海底。入穴。則海溢為潮。出穴。則潮退出。入有節。故潮水有期。

駕鼈為橋梁

〔集仙錄〕穆王駕鼈龜魚鼈為梁。濟弱水而升。崑崙會西王母。〔山海經〕從山多三

足鼈。大如山。

似子萬里眼

〔杜甫詩〕乾坤萬里眼。

徒倚千尺檣。稍疑性命輕。終覺意氣強。寄言漆國叟。此去真望洋。

〔莊子〕秋水時至。

百川灌河。涇流之大。兩涘涖涯之間。不辨牛馬。於是焉。河伯欣然自喜。以天下之美。為盡在己。順流而東。行至於北海。東面而視。不見水

端。於是焉。河伯始旋其面目。望洋向若。而嘆曰。野語有之曰。問道百以為莫己若者。我之謂也。〔按〕史記。莊子蒙人名周。嘗為蒙漆園

吏。注曰。地理志。蒙縣屬梁。國。故曰漆國。叟。漆古文梁。

便攜學仙子。被髮窮大荒

〔韓愈詩〕翩然下大荒。被髮騎馱驢。

登岸泊道隆觀觀有金人闖海時。斫柱刀跡因聽客話蓬萊山紫霞洞二首

我舟半夜發。舉目流滔滔。倏然風萬里。誰謂水一篙。

〔潘岳詩〕楚浪漲三篙。

幽島不可辨。亂嶽出如鰲。

山嶺曰熾音焦。

侵晨始

登岸身靜心實勞。小徑連沮洳。玄扃闕蓬蒿。彈塗爭走穴。傑步擁朱轡。

〔按〕先生甬東記云。昌國中多大山。四面皆海。人家頗居篁竹蘆葦間。或散在沙塊。非

舟不相往來。田種少。類入海中捕魚。蟾蚌蛇母。彈塗傑步。腥澀。褻味。逆人鼻口。〔名勝志〕昌國在海中。隸寧波府定海縣。

怪花絡璀璨。陰木森蕭騷。東都昔奔潰。南海紛戰艘。簷

楹偶潛伏。部伍爭遁逃。將施攻城火。尙見斫柱刀。黃屋祛曉裊。翠華溼秋濤。

〔宋史〕高宗建炎三年。元朮渡江。入建康。杜充敗降。呂頤浩進航海之

策。帝遂如明州。元朮渡浙來追。帝乘船次定海縣。四年。金人陷明州。乘勝破定海。昌國以舟師來襲御舟。弗及。提領海州張公裕引大船擊之。金人引還。〔按〕志明州即寧波府。

運往龍蛻久。

〔史記〕黃帝採首山銅。鑄鼎於荆山下。鼎既成。龍垂胡

髯。下迎黃帝。帝上騎。羣臣後宮從上者七十餘人。小臣不得上。悉持龍髯。拔墮。墮黃帝之弓。百姓仰望。抱其弓與胡髯。號後世因名其處曰鼎湖。其弓曰烏號。

人來鶴飛高。

〔列仙傳〕蘇仙公。桂陽人。昇雲而去。後有白鶴來止郡城樓上。人或彈之。鶴

以爪攫樓板。似漆書云。城郭是人民非。三百甲子一來歸。吾是蘇公。彈我何爲。

曲巒迷丹鼎。

〔定海縣志〕昌國中多大山。昔葛仙翁煉丹於此。故山以翁名。宋乾道中。耕者得一銅鼎。無足有耳。耳不穿竅。中容一斗。其底煤墨未泯。識者以爲煉丹之

器。云。清沼燭髣毛。毋須踞龜殼。自此辭盧敖。

〔淮南子〕盧敖遊北海。見一士方捲龜殼而食蛤蜊。與之語。鬻然笑曰。吾與汗漫期於九垓之外。吾不可以久駐。舉臂而聳身。遂入雲中。

二

起行海東洲。

按先生甬東記。昌國古會稽海東洲也。

重險忽已渡。由來產神奇。政爲孤絕故。幽芳峯嵒搜。修蟄高嵒赴。

又從舟山過赤嶼轉

入外洋望峯山。山出白艾地。多蛇。峯音宅。峯音額。磬音熬。

荒烟淒暗潮。旭日照晴樹。似聞蓬萊山。去此特跬步。

〔又〕自東霍轉而北行。盡昌國北界。土人云有蓬萊山。衆山四圍峙立。

旋繞小嶼。屹如千尺樓臺。而中處又有紫霞洞。與山爲鄰。中畔通明。方如大車之輿。潮水一退。人可入。或云人不可到。隱隱有神仙題墨。漫不能辨。

蟠根屹中立。發乳森外護。紫氛蒸作霞。玄浪激

爲霧。〔河圖〕崑崙山有五色水。赤水之氣。上蒸爲霞。〔莊子〕騰水上溢。故爲霧。

古穴通若輿。靈文讀不句。赤玉鳥者誰。黃金闕何處。

解見秦山高。又神異經西北荒中有

二金闕。高百丈。銀盤五十丈。二闕相去百丈。有明月珠。徑三丈。光照千里。

常疑方士說。未省仙子遇。芝草空漢廷。

〔高士傳〕四皓采芝歌。莫莫高山深谷。逶迤。畦畦紫芝。可以療飢。

鯨魚壓秦

路。解見秦山高。

彼猶莫能得。今我獨何據。馮夷開水宮。

〔楚辭〕使湘靈鼓瑟兮。令海若舞馮夷。〔山海經〕馮夷人而乘兩龍。

禦寇控風馭。

〔莊子〕列子御風冷然。蓋旬

有五日。而後返。從渠指虛無。此計恐遲莫。

夕泛海東尋梅岑山觀音大士洞。遂登盤陀石。望日出處及東霍山。回過翁浦。問徐偃王舊城。八首

按先生甬東記。梅岑山。梅子真煉藥處。山梵書所謂補怛洛迦山也。唐言小白花山。自山東行。西折爲觀音洞。洞瞰海外。巖中裂。大石壁紫黑。旁罅而兩岐。亂石如斷圭。積伏蟠結。怒潮撻擊。晝夜作魚龍嘯吼聲。又西則爲善財洞。峭石嚙足。泉流滲滴。懸纓不斷。前入海數百步。有巖。土人云。曾有老僧。秉燭行洞穴。且半里。山石合一窾。有光大如盤盂。側首睨之。寬弘潔白。非水非土。遠不辨涯際。又自山北轉。得盤陀石山。巖怪益高。壘石如埵。東望宵宵。想像高麗日本界。如在雲霧蒼莽中。日初出。大如米

簪海盡赤。跳踊出。天末六合翕然鮮明。及日光照海。薄雲掩蔽。空水弄影。恍類鋪僧伽黎衣。或現或滅。南望桃花馬秦諸山。嵌空刻露。屹立亘浸。如世疊太湖靈壁。不著寸土尺樹。天然可愛。東南望東霍山。山多大樹。徐市蓋駐舟此。又有沙山。細沙所積。海日照之有芒。手攬則霏屑。下漸成窪穴。潮過又補。終不少損。旁有石龍蒼白。角爪鱗鬣。具蜿蜒跨空。亘三十里。舟經其下。西轉別為洋山。中多大魚。又北則為胸山。岱山。石蘭山。魚鹽者所聚。又自北而南。則為徐偃王。戰洋世言偃王既敗。不之彭城。而之越。棄玉几。硯會稽之水。

山月出天末。水風生晚寒。扁舟劃然往。萬頃相渺漫。星河白搖撼。島嶼青屈盤。遠應壺嶠接。壺嶠。解見病起讀列子。深

已雲夢吞。〔書〕雲土夢作。又注。二澤名。按志。今隸湖廣岳州府。蟠木繫子纜。〔史記〕北至幽陵。南至交趾。西濟流沙。東至蟠木。動靜之物。小大之神。日月所照。莫不砥屬。注。海外經曰。東海中有山焉。名曰度索。上有大桃樹。屈蟠

三千。扶桑纓我冠。寸心役兩目。少試鯨魚竿。解見第八首。

二

起尋千步沙。解見題注。穹石塞行路。怒濤所攃擊。攃音瘡。〔博雅〕撞也。徒以頑險故。卓哉梅子真。與世良不遇。上書空雪

衣。燒藥迺烟樹。〔前漢書〕梅福。字子真。九江壽春人。初為郡文學。因縣道上變言事。輒報罷。時王鳳專政。王氏浸盛。福上書累千言。不納。居家嘗以讀書養性為事。至元始中。王莽顯政。禍一朝棄妻子。去九江。至今傳以為仙。其後人有見福於會

稽者變姓名爲吳市門卒云。列仙傳：梅福棄妻子去九江，訪道積年，遇空同仙君，授以內外丹法。後至飛鴻山，結庵修煉，功成，神遊體外，丹光燭天，乘青鸞飛昇而去。自後飛鴻山號曰梅仙山。

玄螭時側行，縞鶴一迴顧。〔遊〕 玄螭蟲象，並出進兮，形變虬而透蛇。〔世說〕支道林好鶴，時有遺其雙鶴者，翅長欲飛，林意惜之，乃斲其翮，鶴軒翥不能復起，乃舒翼反顧視之，如似懊惋。道林曰：既有凌霄之姿，何肯爲人耳目？翫乎養令翮成，即放飛去。〔古歌詞〕飛來自鶴從西北方，十五五羅列。

成行，妻孥被病，不能相隨。五里還顧，十里徘徊，吾欲啣汝去，口噤不能開。吾欲負汝去，毛羽日摧頽。

美門曰：子名在丹臺玉室，何憂不仙。滄海晝多霧。

三

茫茫瀛海間，海岸此孤絕。飛泉亂垂纓，險峒森削鐵。天香固遙聞，梵相俄一瞥。魚龍互圍繞，仙鬼驚變滅。

解見題注。又定海縣志：方廣華嚴，言善財第二十八參，觀自在菩薩與諸大菩薩圍繞說法於此。然世無有知之者。始自大唐中間，有梵僧來潮音洞前，燔十指，指盡，親見大士說法，授與七寶石，因結茅以居。至梁貞明二年，有日本僧惠鐸，得觀音像於五臺山，將奉歸其國。

舟觸新螺礁，蓮花當洋，舟蔽不前，鐸懇禱，若我國無緣見佛，當從何所建立精藍。有頃，舟向潮音洞，居民張氏目睹斯異，遂捨所居，築觀音院於梅岑山之陰。自山東行，西折爲潮音洞，乃大士示現處。又有善財洞，以善財參禮得名。

磬聚禪悅。禪悅，解見參寥泉。笑撚小白花，秋潮落如雪。

四

長嘯山石裂。我今在東溟。游目出重徼。褰衣窮絕徑。奇氛抱珥赤。〔雜占書〕日冠者如半暈也。法當在日上有冠又有兩珥者尤吉。遠影摩空青。

想像嗚谷水。嗚谷解見柱杖歌。徘徊爨龍形。爨龍解見讀列子。晨昏相經絡。稚耄不得寧。〔淮南子〕日出於嗚谷浴於咸池拂於扶桑是謂晨明登於扶桑之上爰始將行是謂

朏明。至於曲阿。是謂朝明。臨於曾泉。是謂蚤食。次於桑野。是謂晏食。臻於衡陽。是謂禺中。對於昆吾。是謂正中。靡於鳥次。是謂小遷。至於悲谷。是謂暝時。迺於女紀。是謂大遷。經於虞淵。是謂高春。頓於連石。是謂下春。至於悲泉。爰止羲和爰息六螭。是謂懸車。薄於虞泉。是謂

黃昏。淪於蒙谷。是謂定昏。日入崦嵫。經於細柳。入於虞泉之汜。曙於蒙谷之浦。日西垂。景在樹端。謂之桑榆。〔論衡〕儒者謂日且出扶桑暮入細柳。豈若柯斧爛。看碁了千齡。〔述異記〕信安郡石室山。晉時樵者王質伐木入

山。見二童子圍棋。與質一物如棗核。食之不覺饑。以所持斧置坐。而觀棋局未終。童子指謂之曰。汝斧柯爛矣。質歸鄉里。無復當時之人。

五

遙觀杳無極。宛與東霍鄰。〔定海縣志〕東霍山在昌國海中。悲夫童男女。去作魚鼈民。解見大佛寺。紆嶼尙餘聚。蓬山寧爾神。

〔名勝志〕大蓬山在慈谿縣東北三十里。又名蓬蓬山。秦始皇欲從此航海達蓬山故名。古棹苔駐跡。按甬東記。東霍山山多古棹。徐市蓋駐舟此。仙枰竹祛塵。〔鄞縣志〕白石山。玲瓏峭拔。上有神仙菜枰。短褐

徒爲拂。飛槎邈難親。好攜支機石。去躍織女津。解見海上人槎畫軸。

笑揮百川流。東赴無底壑。

解見讀列子。

青天分極邊。白浪屹為郭。卉裳或時來。

卉裳解見次定海候濤山。

椎髻亦不惡。

前漢西南夷傳。

皆椎結耕田。注結讀曰髻。為髻如椎之形也。朝鮮傳同。

投珠鮫人泣。

博物志。鮫人從水出。寓人家。積日賣綃。將去。從主人索一器。泣而成珠滿盤。以與主人。

淬劍龍子愕。

王褒聖主得賢臣頌。工人之用鈍器也。勞筋

苦骨。終日砭砭。及巧冶鑄干將之樸。清水淬其鋒。越砥礪其銛。水斷蛟龍。陸刺犀革。里也。怒而為鳥。其名為鵬。鵬之背。不知其幾千里也。化而飛。翼若垂天之雲。遠遊上寥廓而無天。注寥廓廣遠也。

海宮眩鱗縷。商舶豐貝錯。盍不呼巨鵬。因風泝寥廓。

莊子。北冥有魚。其名為鯤。鯤之大。不知其幾千

老篙迴我舟。沙壘晚烟起。

粵音。坳。

蒼茫魚鹽場。

解見題注。

寂歷鼓吹里。

定海縣志。鼓吹山。在昌國山之陰。今有偃王祠。山巔平坦如掌。可容數百人。每風雨晦冥。隱隱有鼓吹聲。

人民悲舊王。歲月祀遺趾。終捐玉几研。不掇朱弓矢。

水經注。徐偃王之異言。徐君宮人娠而生卵。以為不祥。棄之水濱。孤獨母有犬名曰鶻。倉獵於水側。銜卵以歸。獨母以為異。覆煖之。

遂成兒。生時偃。故以為名。徐君宮中聞之。乃更錄取。長而仁智。襲君徐國。後鶻倉臨死。生角而九尾。實黃龍也。偃王葬之徐中。今見有狗齧焉。偃王治國。仁義著聞。欲舟行上國。乃導溝陳蔡之間。得朱弓矢。以得天瑞。遂囚名為號。自稱徐偃王。江淮諸侯服從者三十六國。周王聞之。遣使至楚。令伐之。偃王愛民不闕。遂北走彭城。百姓隨者萬數。因名其山為徐山。山上立石室廟。有神靈。民人請禱焉。

東西八駿馬。

解見讀穆天子傳。

今古萬螻蟻。

莊子。道在螻蟻。

此事如或

然須滿會稽水。

八

我行半天下，始到東海隅。水落礁石出，中飛兩鶉鷓。

〔莊子〕魚不畏網罟，而畏鶉鷓，以能竭澤也。〔爾雅〕鶉鷓似鶉，喙長尺餘，頷下胡大如數升囊。若小澤中有魚，便共杼水滿其胡。

而辱之。水盡魚見，乃共食之。故一名鶉鷓，猶滄澤也。

情知瓊奇產，勢與險阻俱。在夷豈必陋，雖聖猶乘桴。吭風丹穴鳳。

〔山海經〕丹穴之山，有鳥五色而文，名曰鳳。

韓愈詩引吭吐。

鏗轟吭與頰通。

尾雨青丘狐。

〔山海經〕青丘之國，有狐九尾，德至乃來。〔幽明錄〕董仲舒下帷講誦，有客來訪云：欲雨，董戲之曰：集居知風，穴居知雨，君非狐狸，則是鼯鼠，客遂化老狐而走。

幸隨任公子。

不愧七尺軀。

〔莊子〕任公子為大鈞，巨緇五十犗，以為餌，蹲乎會稽，投竿東海，且且而釣，期年不得魚，已而大魚食之，牽巨鈞，陷沒而下，鷲揚而奮鬣，白波若山海，水震蕩，聲侔鬼神，憚赫千里，離而腊之，自澗河已東，蒼梧已北，莫不厭若魚者，嘗音介。

初海食

乍秋冒重險，增我愁恨端。故人喜我來，為我具杯盤。盤中何所有，海族紛攢攢。盲風吹衣慘。

〔月令〕仲秋之月，盲風至。〔注〕

盲風疾風也。

蜃雨洒席寒。

〔說文〕蜃，南方夷也，音擅，上聲。嶺南異物志：蜃煙，蜃雨，無別晨暮。

春魚白如刀，小棹凌碧湍。淡菜類山結，巨鏹就石剗。

〔本草〕

淡菜，生東南海中，南人好食之。〔說文〕鏹，大鉏也，音嬰。

水母或潮捲。

〔郭璞賦〕瓊蛤腹蟹，水母目蝦。〔注〕水母有智識，無耳目，以蝦為目，潮來羣蝦擁水母，若竹槎然，潮退蝦去，為人剗。

〔韓愈詩〕有洞若神窟。〔說文〕剗，削也。鳥獸切。音斲。

食潮復來。蝻蟬乃泥蟠。蝻音囚。蟬音謀。蟹屬。

蛟鼉惜不得。況間龜與鼃。其餘亦瑣碎。充此一日歡。洗濯烟瘴氣。磨礱沙

淤癥。非歟嗜土炭。否則殊鹹酸。

〔柳宗元書〕人之好辭攻書。皆病辭也。嘗見病心腹人。啗土炭。嗜鹹酸。不得則大戚。

珍須壓狔戀。

〔晉書〕初。元帝公私交困。得狔以爲美。項上一鬣尤佳。輒以

薦帝呼爲禁。鸞狎同豚。

異且輕馬肝。

〔史記索隱〕燕太子丹與荆軻共乘千里馬。曰馬肝美。即殺馬進肝。〔前漢儒林傳〕景帝曰。食肉毋食馬肝。未爲不知味也。言學者毋言湯武受命不爲恩。

褻味分罽網。腥涎

雜瓢箪。

褻味腥涎。解見泊道隆觀。

奈何齊魯邦。徒設邾莒餐。

解見問參寥泉。

對之輒棄置。誰謂吾腹寬。川澤禮當爾。勿云行路難。

望馬秦桃花諸山問安期生隱處

按甬東記。盤陀石山。南望桃花馬秦諸山。嵌空刻露。屹立巨浸。如世壘太湖靈壁。不著寸土尺樹。天然可愛。安期生。解見泰山高。〔定海縣志〕安期先生祠。在昌國馬

秦山。舊傳安期生隱此。其鄉亦名安期鄉。桃花山。解見次定海候濤山。

此去何可極。中心忽傷悲。亂山插滄海。千疊壯且奇。信哉神仙宅。而養雲霧姿。鋼鏤鬼斧缺。刮濯龍湫移。

〔韓愈龍移詩〕天昏地黑蛟龍移。雷驚電激激雄雌。隨清泉百丈化爲土。魚鼈枯死吁可悲。〔注〕湫。初在平地。一日風雷移居山上。其山下湫。遂化爲土。〔按〕漢地理志。鄆有鎮亭山。西界於越。南跨天台。山勢極高。蟠結數十里。山有龍湫。

坎窞森立劍。

槎牙割靈旗。

〔易〕習坎入於坎窞。王安石詩。槎牙死樹啼老鳥。〔前漢郊祀志〕以牡荆畫幡。日月北斗登龍。以象太一三星爲泰一鎗旗。命曰靈旗。

微涵赤岸水。

郭璞賦。鼓洪濤於赤岸。〔枚乘七發〕凌赤岸。攀扶桑。注。

赤岸。 贖產瓊田芝。〔十洲記〕祖洲東海中地方五百里。上有不死草。生瓊田中。草似菘苗。人已死者。以草覆之。皆活。或名爲神芝。

老生今安在。方士不我欺。經過燕齊靡。出

沒楚漢危。挾山作書鎮。分海爲硯池。殘花錦石爛。淡墨珠巖披。

〔定海縣志〕桃花山。安期生以醉墨洒石上。遂成桃花。故名。〔按〕地輿志。珠巖。屬寧波府象山縣。自海中

望之。嘗有寶氣。故名。

東溟地涵蓄。北極天幹維。

〔天問〕幹維焉繫。天極焉加。〔注〕說文曰。幹。轂端也。則是車轂之內。以金爲筭。而受軸者也。極。謂南北極。天之樞紐。常不動處。譬則車之軸也。幹一作筭。並音管。

玉鳥

投已遠。解見秦山高。

桑田變難期。

〔列仙傳〕麻姑謂王方平曰。吾見東海三爲桑田。

誓追凌波步。

〔曹植賦〕凌波微步。羅襪生塵。

行折拂日枝。

〔淮南子〕扶桑在陽州日所

拂。〔注〕十日所出。九日居下枝。一日居上枝。

羽丘杳如夢。

解見藏髮。髮子圖。

玄圃深更疑。

〔十洲記〕崑崙三角。其一角正北。名曰閼風巖。其一角正西。名曰玄圃堂。其一角正東。名曰崑崙宮。〔淮南子〕崑崙山。去地萬

一千里。上有層城九重。或上倍之。是謂閼風。或下倍之。是謂縣圃。玄圃一作縣圃。

豈無抱朴子。

解見景陽宮。

去我迺若遺。空餘煉藥鼎。

藥鼎。解見泊道隆觀。

尚有樵人知。